

GENESISE:

MOTHO O BATLA SESUPO

[illegible][illegible][illegible][illegible][illegible]

DIT

HUTO T
TSA B

SA BAI
BAGOLO

EBELE



**DITHUTO TSA BAEBELE
TSA BAGOLO**

GENESISE: MOTHO O BATLA SESUPO

DITHUTO TSA BAEBELE TSA BAGOLO

**Africa Coordinated Curriculum
for Bible Study**

©Copyright, International Publications Services
Didirisiwa ka tetelelo ya International Publications Services

A8 - 4Ps

Copyright, 2005, IPS, All Rights Reserved
International Publications Services
www.ipsimb.com
at84s-bot-tsw

**Di Anamisiwa le Go Gatsiwa ke
Baptist Publications
P.O. Box 228
Lobatse, Botswana**

GENESISE: MOTHO O BATLA SESUPO

Thuto	Tlhogo	Tsebe
1	O Dirilwe mo Setshwanong sa One.....	3
2	O Gololesegile mme O Na le Boikarabelo.....	7
3	Modisa Wa Ga Nnake.....	11
4	Motho mo Leanong la Modimo.....	15
5	Go Ya Kwa Modimo O Gogelang Teng.....	20
6	Go Kgaratlha le Pelaelo.....	24
7	Go Aba se Modimo O se Kopang.....	29
8	“Bo-Nna” Ga Bo a Lekana.....	33
9	Go-Kopana le Modimo Go Tlisa Phetogo.....	37
10	Go Kgaratlha le Boikgodiso le Lefufa.....	42
11	Go Bona Nonofa mo Go Direleng Modimo.....	47
12	Go Baya ba Bangwe Pele Ga Go Ipaye.....	51
13	Go Letlana.....	55

O DIRILWE MO SETSHWANONG SA ONE

DIKWALO TSA GO ITHUTA KWA GAE: Genesis 1-2.

DIKWALO TSA THUTO YA GOMPIENO:

Genesis 1:26-27, 31; 2:7, 18-25.

TEMANA YA TLHOGO: *“Mme Jehofa Modimo a bopa motho ka lorole lwa mmu, mme a budulela moya wa botshelo mo dinkong tsa gagwe; mme motho a direga moya o o tshedileng”* (Genesis 2:7).

Genesis o bidiwa lokwalo lwa ditshimologo. Ke lokwalo lwa ntlha mo Baebeleng. Lokwalo lo lo re bolelela kaga tshimologo ya dilo tsotlhe. Genesis o re bolelela kaga tshimologo ya legodimo le lefatshe, motho le diphologolo, ditswa-mmung le ditlhare.

Tshimologo e e bidiwa tlhologo. Yo o tlhodileng dilo e ne e le Modimo. Re itse gore Modimo O ne O sena tshimologo. O ntse O le teng ka metlha. O ntse O le teng le pele ga O tlhodile sepe. Jalo O ne Wa tlhola lefatshe lotlhe le sengwe le sengwe se se mo go lone.

Go-tlhola go raya go dira sengwe seša se sa tswe mo go sepe. Re dira borotho ka boupi. Mme seo ga se tlhole sepe. Modimo O dirisitse nonofo ya One fela go dira dilo tse dintšha di sa tswe mo go sepe. O buile mme dilo di ne tsa direga.

Modimo O dirile sengwe le sengwe kafa leanong la One. Batho gompieno ba ba ithutang kitso ba gakgamadiwa ke tsela e Modimo O rulagantseng lefatshe le dilo tse di mo go lone ka yone. Bala Genesis 1:31. Modimo Wa leba se O se dirileng mme Wa bona fa go le molemo thata. Le rona re ka bona bontle jwa lefatshe la Modimo. Fa re jala dipeo mme re roba thobo, re ka bona leano le le molemo la Modimo mo lefatsheng la One.

Jaanong bala kaga gore Modimo O dirile motho jang.

(Balela tlelase Genesis 1:26-27, 31.)

MO SETSHWANONG SA ONE

Genesis 1:26-27 o re bolelela gore Modimo O dirile motho. Genesis 2:7 o re bolelela se Modimo O se dirisitseng go dira motho. Baebele ga e re bolelele leano tota le Modimo O le dirisitseng. Ga re tlhoke go itse seo. Re tlhoka fela go itse yo o re dirileng le gore O re dirile ka nthā ya'ng.

Modimo O rile, “*A re direng motho.*” Batho ba gakgamala gore ke mang yo o thusitseng Modimo mo tirong e. “Re”, e ne e le bo-mang? Fa re bala mo lokwalong lwa ga Johane mo Kgolaganong E Ntšha, re tla bona “*Lefatshe le dirilwe ka ene*” (Johane 1:10). Temana e e buile kaga Jesu, Lesedi la lefatshe. Lefoko “re” le re supetsa gore Modimo, Rara wa lobopo, Morwa le Mowa O O Boitshepo ba dirile jaaka Bongwe-fela go tlhola motho.

Modimo O rile O tla direla motho mo setshwanong sa One. Lefoko setshwano le raya sengwe se se dirilweng jaaka selo se sengwe. Motho e ne e le sone sebopiwa fela se se dirilweng mo setshwanong sa One. “Mo setshwanong sa rona” ga go reye gore mmele wa motho o ne o lebeja jaaka Modimo. Modimo ke Mowa. Motho o tshwana le Modimo ka ditsela tse dingwe. Modimo O dirile motho gore a nne motho. Motho o ka akanya. O ka tlhophisa se o ratang go se dira. O ka bona le go nkga le go leka dijo. O ka itumela le go hutsafala le go nna bogale. O ka utlwa mo pelong ya gagwe keletso ya go itse Modimo. Mme, o ka nna le bokopano le Modimo. Se se farologane le diphologolo. Pharologanyo e e bidiwa mowa wa motho. Mowa wa motho o jaaka Modimo me ga o ketla o swa gope.

TAOLO YA MOTHO MO LOBOPONG LWA MODIMO

Bala temana 26 gape. “*Taolo*” e raya go nna le nonofo mo godimo ga selo sengwe gongwe go laola mo godimo ga sone. Modimo O file motho tshwanelo ya go laola le go tlhokomela lefatshe. Motho o tshwanetse go tsaya dilo tse o di tlhokang mo lefatsheng le mo diphologolong.

Mme gape motho o tshwanetse go dira se ka tsela e e siameng. A seka a senya masimo. A seka a senya lefatshe ka meepo ya gagwe. A seka a bolaya ditlhare tsotlhe fa a fudisa diphologolo tsa gagwe. A seka a bolaya diphologolo tsa naga fela go tsaya letlalo go le rekisa. Fa motho a senya lefatshe, o tla senya botshelo gape. Mme o tla senyetsa bana ba gagwe lefatshe. Ga ba ketla ba nna le boswa jwa bone jo bo siameng jo Modimo O ba bo baakanyditseng go nna le jone.

(Balela tlelase Genesise 2:7.)

MOWA WA BOTSHELO

Genesise 2:7 a re, “*Modimo O bopile motho ka lorole lwa mmu, mme wa budulela mowa wa botshelo mo dinkong tsa gagwe; mme motho a direga mowa o o tshedileng.*” Morago ga Modimo O sena go dira lefatshe le dilo tsotlhe tse di mo go lone, O dirile motho. Modimo O buduletse mo mothong mowa wa botshelo. Motho a le mowa o o

tshedileng. Dibopiwa tse dingwe le tsone di a tshela, mme motho ke ene fela sebopiwa se se tshwanang le Modimo. Mowa wa motho o a tshela mme ga o ketla o swa gope.

Motho o ka tlhophha gore o tla tshela jang. Batho bangwe ba tlhophha go direla matshelo a bone leano. Ba tshela le Modimo. Morago ga go swa ga mmele wa motho, bao ba tshedileng le Modimo ba tla nna le Modimo ka bosenabokhutlo. Ba bangwe ga ba ketla ba nna le Modimo, mme mewa ya bone e tlaabo e sa swa. Ba tlaabo ba tlhomolapelo, ba sa itumele, le go sotlega mo moleteng.

(Balela tlelase Genesis 2:18-25.)

MODIMO O FILE MOTHO KOPANTSHO-THUSO

Modimo O dirile monna. Modimo O ne Wa mo fa tiro ya go laola le go tlhokomela lefatshe. Mme monna o ne a le nosi mo tirong ya gagwe. Jalo Modimo O dirile mosadi. O dirilwe go nna le monna le go mo thusa mo tirong ya gagwe. Adame o ne a itumetse fa a bona Efe. O ne a na le mongwe yo o tshwanang le ene go nna le ene le go mo thusa mo go tsotlhe tse o di dirileng.

Adame le Efe ba ntse mmogo. Ba dirile legae la ntlha. Modimo O ne Wa segofatsa Adame le Efe. O ba boleletse go nna le bana. *"Mme Modimo wa ba segofatsa, mme Modimo wa ba raya wa re, 'Atang, lo ntsifale, lo tlale ka lefatshe lo le feny'e' "* (Genesis 1:28). O ba boleletse go nna *"nama e le nngwe-fela."* Modimo O ne O ikaeletse Adame le Efe go rulaganya mmogo le go kopantsha letlhoko la yo mongwe. Modimo O rile monna o tshwanetse go tlogela batsadi ba gagwe mme a nne le mosadi wa gagwe. E ne e le thulaganyo ya Modimo ya monna a le mongwe-fela le mosadi a le mongwe-fela go dira legae la bone le go nna mmogo ka matshelo a bone otlhe. Ke loso fela lo lo tshwanetseng go fedisa nyalo ya bone.

Modimo O dirile legae la ntlha dingwaga tse dintsi pele ga O dirile kereke. Legae le tlhokega mo Modimong. Ke fa batsadi ba tshwanetseng go rutela bana ba bone teng. Fa batsadi ba sa dire se, lefatshe le senyegile. Morafe ga o kake wa nonofa kwa-ntle ga magae a a siameng. Lefatshe ga le ketla le nna lefelo le le siameng go nna.

Modimo O file Adame tiro ya go raya diphologolo tsotlhe maina. Re fa diphologolo tse re di ruang maina. Jalo re bona gore diphologolo tsotlhe ke tsa motho go di dirisa le go di babalela.

DILO TSA GO DI GOPOLA

Modimo O tlhodile lefatshe le le siameng. Monna o bopilwe ka keletso ya go itse Mmopi wa gagwe. O ne a fiwa mothusi gongwe mosadi. O ne a fiwa legae la go tla kwa go lone fa a lapile gongwe a le bodutu. Adame o ne a filwe tiro go e dira. O reile diphologolo maina. Lefatshe le diphologolo e ne e le tsa gagwe. Lobopo lwa Modimo lo ne lo le molemo.

A o supa ka botshelo jwa gago gore o bopetswe mo Setshwanong sa Modimo? A o latela leano le le molemo la Modimo la go tshela? Gongwe a leano la gago le kgakala le Modimo? A o a rulaganya, mme ka tshwanelo o babalela khumo e e leng ya gago? A o bona mosadi wa gago gongwe monna jaaka mongwe yo o nang le wena mo go direng legae la gago? A o bala le go ithuta Baebele go itse gore Modimo O batla motho go dira legae la gagwe jang?

Maikaelelo a thuto e ke go re thusa go bona gore lobopo lwa Modimo lo ne lo le molemo. O rulaganyeditse lefatshe le motho sentle. Ka go latela leano la Modimo re ka nna le botshelo jo bo siameng.

SE THUTO E E SE RE RUTANG

1. Sengwe le sengwe se Modimo O se tlhodileng se ne se le molemo.
2. Modimo O rulagantse sentle fa O tlhodile lefatshe.
3. Modimo O rulaganyeditse monna sentle fa O mo tlhodile.
4. Modimo O rulaganyeditse monna le mosadi go dira mmogo ka kopano le mo maikaelelong.
5. Modimo O rulagantse mme Wa tihola legae pele ga go tihola dikereke.
6. Modimo O rulaganyeditse batsadi go ruta bana ba bone kaga Modimo.
7. Modimo O batla go nna le botsalano le motho.
8. Modimo O na le leano la mongwe le mongwe yo o dumelang mo go Morwa One.

O GOLOLESEGILE MME O NA LE BOIKARABELO

DIKWALO TSA GO ITHUTA KWA GAE: Genesis 2:15-17; 3.

DIKWALO TSA THUTO YA GOMPIENO:

Genesis 2:15-17; 3:1-13, 23.

TEMANA YA TLHOGO: *“Gonne lona bagaetsho lo bileditswe kgololesego; mme lo seka lwa fetola kgololesego ya lona sebaka sa nama go itirela, mme lo nne batlhanka, mongwe wa yo mongwe mo loratong”* (Bagalatia 5:13).

O gololesegile mme o na le boikarebelo ke go re motho o filwe kgololesego ya ga tlhopha gore o tla tshela jang. Mme motho o tla atholwa. O tshwanetse go fa Modimo karabo ya se o se dirang. Motho o na le boikarabelo mo Modimong ka ditlhopho tsa gagwe.

Re ithutile beke e e fetileng ka popo ya lefatshe. Modimo O dirile sengwe le sengwe. O dirile motho mo setshwanong sa One ka keletso ya gore a itse Modimo. Modimo O file monna tiro go e dira mme O mo file mothusi. Tsotlhe tsa lobopo lwa Modimo di ne di le molemo. Gompieno re tla bona se Adame le Efe ba se dirileng mo lefatsheng le le molemo la Modimo.

(Balela tlelase Genesis 2:15-17.)

TSHIMO E NTLA

E ne e le thulaganyo ya Modimo mo go Adame le Efe go nna le lefelo le le siametseng go nnwa. O dirile tshimo e ntle mme Wa ba e fa go nna legae la bone. Ba ne ba ka bona dijo tsa bone mo tshimong. Gape ba ne ba tshwanetse go tlhokomela tshimo. Mo go Genesis 2:25 re bala gore Adame le Efe ba ne ba sa itse ditlhong. Ba ne ba itumela mo legaeng le le siameng le Modimo O le ba fileng.

Mo tshimong go ne go na le sengwe le sengwe se Adame le Efe ba ne ba se tlhoka. Mme go ne go na le setlhare se Modimo O ne O ba iditse go se roba. Ba ne ba sa tshwanela go ja loungo lwa sone. Setlhare seo se ne se bidiwa *“setlhare sa kitso ya molemo le bosula.”* Modimo O boletse Adame le Efe gore ba tla swa fa ba ja loungo lwa setlhare se. Eketse Adame le Efe ba ne ba itumelela go nna le go dira mo tshimong ya bone ya legae e ntle. Ba ne ba amogetse leano la Modimo mo go bone mme ba ikantse Modimo.

(Balela tlelase Genesis 3:1-13.)

SATANE O RAETSE EFE GO LEOFA

Letsatsi lengwe noga e tsile kwa go Efe. Noga e ne e le Satane. O ne a tletse maaka le boferefere. O batlile go senya botshelo jo bo siameng jwa ga Adame le Efe mo tshimong. O itsile gore Adame le Efe ba ikantse me ba obametse Modimo. Noga e itsile gore e ka senya lobopo lwa Modimo lo lo siameng fa e ka dira gore Adame le Efe ba belaele Modimo. E batlile go senya boikanyo jwa bone mo Modimong.

Jalo noga e boditse Efe potso. (Bala Genesis 3:1-3.) Efe o ne a dumela go bua le noga. O ne a sena tlhagiso ya gore noga e batlile go mo tsietsa. Jalo noga ya aketsa Efe. E rile go ja loungo go ne go se kake ga tliša loso. Satane o solofeditse Efe gore o ka itse sengwe le sengwe fa a jele loungo lwa setlhare sa kitso ya molemo le bosula.

ADAME LE EFE BA LEOFIE

Efe o reeditse. O ne a leba setlhare mme a bona se lebega monate. O ne a simolola go belaela gore se Modimo O se buile e ne e le boammaaruri. Efe o ne a le gaufi le go tlhopho. Ka gonne boikanyo jwa gagwe mo Modimong bo ne bo ile, o dirile tlhopho e e phoso. Efe o ne a latlha thulaganyo ya Modimo. O tlhophile dikakanyo tsa gagwe go nna mogogi wa gagwe. Sebe se tsile mo tshimong e ntle, mme leano la Modimo le le siameng le ne la senyega. Efe o jele loungo. Mme a lo fa Adame. Adame le ene a ja.

Ka bonako fa Adame le Efe ba jele loungo lo lo iditsweng, dilo di le pedi di diragetse. Ba itsile gore ba leofile. Ba ipone molato le ditlhong. Ba ne ba na le kitso ya molemo le bosula. Karolo eo ya polelo ya ga Satane e ne e le boammaaruri. Mme jaaka kitso ya sebe e tsene mo matshelong a bone, Adame le Efe gape ba itsile poifo. Ba lemogile gore ba ne ba sa apara sepe. Mebele ya bone e ne e tlhoka go apesiwa. Ba tlhokile bokopano le Modimo. Ba rokile matlhare go dira diaparo. Mme go ne go se na sepe se ba ka se dirang go tlosa poifo le bokopano jo bo thubegileng le Modimo.

ADAME LE EFE BA KOPANE LE MODIMO

Genesis 3:8-10 o re bolelela kaga go-kopana ga Modimo le Adame le Efe. Eketse Modimo gantsi O ne O tsamaya mo tshimong mme o ba etela. Pele, Adame le Efe ba ne ba kopane le Modimo ka boikanyego le boitumelo. Jaanong ba ne ba tshaba. Fa ba utlwiwe Modimo O tla, Adame le Efe ba ne ba iphitlha.

“Lo kae?” go boditse Modimo.

Adame le Efe ba ne ba ema fa pele ga Modimo. Ba boleetse Modimo kaga ditlhong tsa bone. Ba supeditse Modimo poifo ya bone. Jehofa Modimo O tshwanetse a bo a ne a hutsafala, ka gore ga a ise a tlhole a kopana le Adame le Efe mo loratong le mo boikanyong. Sebe se ne se beile lobota fa gare ga Modimo le motho. Jalo Modimo Wa dira leano le leša go tlisa lorato le boikanyego fa gare ga Modimo le motho gape. Leano le ke Tsela ya Poloko e e boletsweng mo Baebeleng mo Kgolaganong E Kgologolo le E Ntšha.

ADAME LE EFE BA NE BA LE MOLATO

Fa Adame le Efe ba lemogile seemo sa bone, ba lekile go baya molato wa sebe sa bone mo go mongwe o sele. Adame o beile Efe molato. Efe o beile noga molato. Mme botlhe ba itsile gore ba ne ba le molato. Modimo ga O a ka Wa itshwarela ope wa bone. Mongwe le mongwe o ne a tshwanelwa ke go otlhaiwa. Mongwe le mongwe o ne a tshwanelwa ke go emela setlhabi sa tatlhegelo ya bokopano. Lobopo lo ne lo senyegile. Bosula bo ne bo amogetswe ke motho ka tlhopho ya gagwe ya bo-ene.

(Balela tlalase Genesis 3:23.)

ADAME LE EFE BA A OTLHAIWA

Ditemana tse di setseng mo go Genesis 3 di re bolelela kaga kotlhao e Adame le Efe ba e amogetseng. Ba ne ba ganne leano la Modimo mo go bone la go nna mo tshimong e ntle. Jalo Modimo Wa ba leleka mo tshimong go itirela legae la bone. Adame o ka dira go bona dijo. O ne a se ketla a etelana le Modimo mo bosigong jo bo tsididinyana.

Se ga se phetso e e monate ya polelo ya rona. Modimo O tlhodile lefatshe. Go-tlholaga One go ne go le molemo. Adame le Efe ba ne ba na le legae le le siameng le bokopano le Modimo. Mme noga ya dira Efe go belaela Modimo. O tlhophile go latela se se bonetseng se siame mo go ene go na le go obamela Modimo. Mme jalo, sebe se tsile mo lefatsheng, mme kgaogano le Modimo e tsile mo lefatsheng. Adame le Efe ba ne ba na le boikarabelo jwa ditiro tsa bone. Ba ne ba na le boikarabelo ka go leofisa yo mongwe.

DILO TSA GO DI GOPOLA

Le eleng gompiano Satane o tla mo go rona fa re sa solofeleng go tsiediwa teng. O aka le go re bolelela gore sebe se sentle mme ke sengwe sa go elediwa. O re bolelela gore ga re ketla re otlhaiwa. Ope ga a ketla a itse. Re ja boswa jo jwa go tlhophaphoso, mo go Adame le Efe. Satane ga a re batle go latela leano la Modimo la go tshela. O dira thata go re dira go tlhophaphoso.

Jesu o re file tsela ya go latlha poifo. Fa re mo ikanya, re ka diga lobota fa gare ga rona le Modimo. Re ka kopana le Modimo gape, gotlhe fa, mo lefatsheng le mo legodimong mo bosakhutleng. Fa re tshela le Modimo, O tla re bolelela fa Satane a leka go re tsietsa. Jalo re ka tlhopha go obama. Re ka tlhopha tsela e e siameng.

SE THUTO E E SE RE RUTANG

1. Modimo O dirile mongwe le mongwe go tlhopha se o tla se dirang. Mongwe le mongwe wa rona o ka tlhopha go obamela Modimo gongwe re ka tlhopha go leofa.
2. Ga re a tshwanela go leofa. Modimo O tla re fa phenyo mo thaelong.
3. Satane ga a re batle go obamela Modimo. Mme fa re leofa, Modimo O tla re otlhaya.
4. Motho mongwe le mongwe o na le boikarabelo mo Modimong ka se o se dirang.
5. Modimo O re file kgolesego ya go tlhopha. O re batla go tlhopha go O obamela. Re na le boikarabelo mo Modimong ka tlhopho e re e dirang.

MODISA WA GA NNAKE

DIKWALO TSA GO ITHUTA KWA GAE: Genesis 4.

DIKWALO TSA THUTO YA GOMPIENO: Genesis 4:1-10, 12-15.

TEMANA YA TLHOGO: *"Fa motho a re, 'Ke rata Modimo,' mme a ila mogagabo, o maaka; gonne yo o sa rateng mogagabo yo o mmonang ka matlho, ga a kake a rata Modimo o a eseng a o bone."*

(1 Johane 4:20).

Mo dikgaolong 2 le 3 tsa ga Genesis re bala polelo ya tshimo e ntle ya legae e Modimo O ne O e file Adame le Efe. Jalo noga ya raela Efe mme ene le Adame ba baya dikakanyo tsa bone kwa pele go feta leano la Modimo. Boikanyo le tumelo ya bone mo Modimong di ne di thubegile. Ba ne ba tlhophile go ikakanyetsa. Mo kgaolong 4 re tla bona gompieno gore bana ba bone ba dirile mofuta o o tshwanang wa ditlhopho. Kaene o tlhophile go ithokomela pele le go latela dikgopolo tsa gagwe tsa lefufa. O tlogetse tsela ya Modimo ya lorato. O tlhokomologile go babalela monnawe.

(Balela tlelase Genesis 4:1-10.)

LELWAPA LA GA ADAME LO A GOLA

Adame le Efe ba ne ba boleletswe ke Modimo gore, *"Atang, lo ntsifale, lo tlale ka lefatshe lo le fenyè"* (Genesis 1:28). Ba tshwanetse ba bo ba itsile boipelo jo bogolo fa bana ba tsile mo legaeng la bone. Efe o lemogile gore bomorwa ba e ne e le lesego le le tswang kwa Modimong. Fa Kaene a ne a rewa leina, Efe o rile, *"Ke bone monna ka thuso ya ga Jehofa."* Adame le Efe ba ne ba bolelela bana ba bone polelo ya tshimo e ntle. Mme ba bolelela Kaene le Abele kaga Jehofa. Adame o ne a ruta basimane kaga tiro ya bone ya go tlhokomela mmu. Abele o ne a nna modisa. Kaene o ne a nna molemi.

BOSWA JWA GA KAENE LE ABELE

Bala ditemana 3-7 gape. Modimo O ne O tloletse motho mo setshwanong sa One. Kaene le Abele ba ne tshotse sebopego sa mmele mo go Adame le Efe. Ba ne ba tswana le Adame mo moweng. Re bona mo ditemaneng tse gore ba ne ba lemoga letlhoko la bone la bokopano le Modimo. Ba ne ba godisitse mokgwa wa go ntsha dimpho go tlhabela Modimo. Ba ne ba leka go itumedisa Modimo ka ditiro tsa bone, ka

ntlha ya gore ba itsile gore bokopano jwa bone le Modimo bo ne bo thubegile. Ba batlile go duelela maleo a bone. Mme Kaene le Abele le bone ba ne ba jele boswa jwa go tlhophla.

GO TLHAELA TUMELO GA GA KAENE

Polelo e ya ga Genesise ga e tlhalose gore ke ka ntlha ya eng fa neo ya ga Kaene e ne e sa amogelesege kwa Modimong. Mme Bahebera 11:4 a re, *“Ka tumelo a isetsa Modimo setlhabelo se se gaisang sa ga Kaene.”* Jalo mokwadi wa Kgolagano E Ntšha ya Bahebera o dumetse gore Kaene o tlaetse tumelo le boikanyo mo Modimong. E ne e le seemo sa mowa wa gagwe se se dirileng go-ganwa ga mpho ya gagwe.

Re bona fa, poelelo ya polelo ya ga Adame le Efe. Ba letlile pelaelo go ba dira go se ikanye Modimo. Jalo ba ne ba latela dikgopolo tsa bone. Fa ba ne ba tshwanetse go lebagana le Modimo mo seemong sa molato, ba lekile go baya molato mo go mongwe o sele. Kaene o itsile gore mpho ya gagwe e ne e sa amogelesega. O bone gore mpho ya ga Abele e ne e amogelesegile. Jalo o beile Kaene ka ntlha ya go-palelwa ga gagwe. O ne a le bogale. O ne a le lefufa. Mme dikakanyo tsa gagwe tsa mo gogela le eleng kgakala-kgala le thulaganyo ya Modimo. Modimo O re rulaganyeditse go tlhokomelana mo loratong. Kaene o ne a amega kaga gagwe fela.

POLAO YA NTLHA

Bala Genesise 4:8-9 gape. Bogale jwa ga Kaene bo ne jwa gola go fitlhelela a se kake a akanya sentle. O ne a sutelela kgakala-kgakala le thulaganyo ya Modimo mo go ene. Letsatsi lengwe o ne a kopa Abele go ya le ene kwa nageng. Abele o ne a sa itse se Kaene o se rulagantseng. Jalo, a mo ikanya mme a tsamaya. *“Kaene a kgomogela Abele monnawe, a mmolaya.”*

Gongwe Kaene o ne a gopotse gore loso lwa ga Abele lo ka mo direla tsela ya go itumedisa Modimo. Abele o ne a ile. O ne a se kake a tihola a tliša dineo dipe kwa Modimong. Kaene ga a ise a ke a lete nako e telele go bona gore tsela ya gagwe e ne e le phoso. Jehofa O tsile kwa go Kaene mme A mmotsa kaga Abele.

KAENE O ARABA POTSO YA MODIMO

Karabo ya ga Kaene mo potsong ya Modimo e ne e le potso e nngwe. Potso ya ga Kaene ke yone e batho ba ntse ba e ipotsa ka nako e telele.

Kaene o rile, *“Ga ke itse; a ke modisa wa ga nnake?”* Modimo O itsile se Kaene o ne a se dirile. Kaene o arabile Modimo ka maaka le potso.

Leano la gagwe le ne le sa dira. Modimo O ne O sa itumela gotlhe-gotlhe ka ditiro tsa ga Kaene. Bala Genesis 4:10 gape.

Sebe sa ga Kaene se ne se tshwanetse go otlhaiwa. O tla gakologelwa gore Kaene e ne e le molemi.

(Balela tlelase Genesis 4:12-15.)

KOTLHAO YA GA KAENE

Fa Adame le Efe ba ne ba leofile ba ne ba lelekwa go tswa mo tshimong. Fa Kaene a ne a leofile o ne a lelekwa go tswa mo gagabo. Modimo O mmoleletse gore o tla nna mofaladi le mokgarakgatshegi. Kaene o ne a se kake a tihola a lema. O ne a se kake a nna le legae. O ne a tshogetse botshelo jwa gagwe fa a kgarakgatshega mo gare ga batho ba o sa ba itseng.

Mme Kaene o rile, *“le sefathlogo sa gago ke tlabo ke se fitlhegetse.”* Seo e ne e le kotlhao e e maswe go di feta tsotlhe. Leano la ga Kaene le ne le sa mmusetsa sepe fa ese botlhoko jo botona. O ne a na le boikarabelo mo ditirong tsa gagwe. O ne a tshwanetse a kabo a latetse leano la Modimo eseng la gagwe. Kaene ga a ise a ke a kope Modimo go mo itshwarela.

Fa Adame le Efe ba tlogetse tshimo, Modimo O ba diretse diaparo go apara. Modimo O ne O santse O ba rata mme O batlile go ba sireletsa. Kaene o simolotse go kgarakgatshega, Modimo O beile lotshwao mo go ene gore batho ba mo lemoge. Jalo ba ne ba se ketla ba mmolaya. Modimo O ne O santse O rata Kaene mme O batlile go mo sireletsa. Batho ba gagametse ka metlha gore lotshwao lo lo mo go Kaene e ne e le eng. Mme selo se se tlokegang mo go rona go se ithuta fa, ke kaga lorato lwa Modimo.

Gape re na le bofelo jo bo botlhoko jwa polelo ya rona. Adame le Efe ba ne ba latlhegetswe ke Abele, le Kaene o ne a leleketswe kgakala. Boipelo jwa bone mo baneng bo ne bo emetswe ke khutsafalo. Mme Modimo O ne Wa ba gakologelwa mme Wa ba fa Sethe. Karolo eo ya polelo e tlisa boitumelo.

Mme Kaene o ne a le kae? Temana 16 ya re, *“Mme Kaene a tswa fa pele ga Jehofa, a aga mo lefatsheng ja Noda, go pota Edena kafa botlhabatsatsi.”*

A KE MODISA WA GA NNAKE?

Batho ba boetse mo potsong ya ga Kaene gangwe le gape. Re batla go tlhokomela mathata a rona pele. Re batla go latela maano a rona. Ga re batle go letla leano la Modimo la lorato go nna mogogi wa rona.

Mme Kaene o ne a otlhaelwa go dira se. O ne a lelekwa fa pele ga Modimo ka ntlha ya go bolaya monnawe. Fa re leba mo tikolong ya rona gompieno, re bona batho ba le bantsi ba ba nang le letlhoko. Bangwe ba tlhoka dilo tsa mmele jaaka dijo le diaparo. Mme ba bangwe ba tlhoka mongwe go ba rata le go ba ruta tsela ya Modimo. Ke bo-morwa-rrarona botlhe. Re badisa ba bo-morwa-rrarona. Kaene o ne a na le boikarabelo. Le rona re na le jone.

SE THUTO E E SE RE RUTANG

1. Re tshwanetse go tlisa neo e e tshwanelang kwa Modimong fa re O obamela.
2. Ga re kake ra obamela Modimo fa re na le maikutlo a a maswe mo go mongwe.
3. Re tshwanetse go itshwarela ba bangwe ka gore re itshwaretswe ke Modimo.
4. Re na le tshwanelo ya go thusa ba bangwe mo tikologong ya rona. Re “modisa wa monnaarona.”

MOTHO MO LEANONG LA MODIMO

DIKWALO TSA GO ITHUTA KWA GAE: Genesis 6:1 - 9:17.

DIKWALO TSA THUTO YA GOMPIENO:

Genesis 6:13-14, 18-22; 9:8-13.

TEMANA YA TLHOGO: *“Ka tumelo Noa, e rile a tlhagisitswe ke Modimo kaga dilo tse di e seng di bonale, a sutelediwa ke Modimo a baakanya ntlo e e kokobalang, gore a boloke ba ntlo ya gagwe”*

(Bahebera 11:7).

Modimo O ne O na le leano mo go Adame le Efe. O ne O na le leano la motho mongwe le mongwe yo o tshedileng morago ga monna le mosadi wa ntlha. Genesis 6:10 o re bolelela kaga monna yo o sa tlwaelesegang yo o latetseng leano la Modimo mo botshelong jwa gagwe. Se ke polelo ya ga Noa. Batho ba bangwe ba malatsi a ga Noa ba ne ba le bosula. Mme Noa o ne a ikantse Modimo. O ne a na le tumelo. O dirile se Modimo O ne O mmoletse go se dira. Jalo ene le ba ntlo ya gagwe ba ne ba bolokwa fa Modimo O senya bosula jwa motho.

(Balela tlelase Genesis 6:13-14, 18-22; 9:8-13.)

SEBE SE TLISITSE LOSO

Dingwaga di le dintsi di fetile Modimo O sena go tlhola lefatshe le tsotlhe tse di mo go lone. Batho ba ntsifetse. Bontsi jwa batho ba, ba ne ba lebala kaga Modimo. Ba ne ba senyegile mme go ikgopola bone fela.

Genesis 6:5 a re, *“Mme Jehofa a bona fa boikepo jwa motho bo le bogolo mo lefatsheng, le go akanya ga megopolo ya pelo ya gagwe gotlhe, go ne go le bosula ka metlha yotlhe.”*

Modimo O ne O bopetse motho go tsalana le One. Motho o ne a na le kitso ya molemo le bosula. Motho o ne a ka tlhophla tsela ya gagwe. Morago ga nako nngwe le nngwe motho o tlhophile tsela e e phoso. Modimo O ne Wa simolola go utlwa-botlhoko gore O dirile motho. O ne Wa ikaelela go “phimola” motho. Modimo O ne Wa ikaelela go senya dilo tsotlhe tse di tshelang go tswa mo sefatlhogong sa lefatshe. Sebe le bosula di ne tsa tlisa loso mo mothong yo o boikepo wa malatsi ao.

NOA O BONE BOTSALANO

Mo teng ga sebe se sotlhe le bosula, Jehofa O ne A bona motho a le mongwe-fela yo o ne a siame. Baebele ya re Noa o dumetse Modimo. O

ne a ipaakantse go obamela Modimo. *“Noa e ne e le monna yo o siameng, a itekanetse mo ditshikeng tsa gagwe; Noa a sepela le Modimo”* (Genesis 6:9). Se ke selo se se gagamatsang. Lefa batho ba ba ne ba le mo tikologong ya ga Noa ba ne ba sala morago dikeletso tsa bone tse di mašetla mme di itumedisa bone fela, Noa, *“o tsamaile le Modimo.”*

Baebele e re bolelela gore Noa o ne a nyetse mme e le rra-bana. Noa o rutile bo-morwawe kaga Modimo. O ne a gogela ba lelwapa la gagwe mo go obameleng Modimo. Noa o ne a ipaakanyeditse go tlisa dithoto tsa gagwe jaaka kabelo kwa Modimong.

Mo Kgolaganong E Ntšha, Baebele ya re Noa *“moreri wa tshiamo.”* Noa o lekile go tlhagisa baagelani ba gagwe go tlogela ditsela tsa bone tse di bosula le go latela tsela ya lorato ya Modimo. Mme re itse gore ga go ope yo o ne a reetsa Noa. Ba tshwanetse ba bo ba tshegile ka monna yo o siameng yo, yo o ne a na le bopelokgale jwa go dira se se ne se siame, fa mongwe le mongwe mo tikologong ya gagwe a ne a dira phoso.

MODIMO O DIRILE KGOLAGANO

Noa o tsamaile le Modimo. Bala Genesis 6:13-14 gape. Modimo O boleletse Noa leano la One lotlhe. O boleletse Noa se O ne O ya go se dira go itshekisa lefatshe mo bosuleng. Noa o ne a na le karolo mo leanong le. Bala Genesis 6:18-22 gape. Modimo O ne Wa solofetsa Noa gore ene le ba lelwapa la gagwe ga ba ketla ba senngwa. Modimo O ne Wa solofetsa Noa gore O tla boloka diphogolo di le pedi tsa mofuta mongwe le mongwe. Lefatshe le ka nna leša le bophepa morago ga morwalela.

NOA A LATETSE LEANO LA MODIMO

Noa o ne a neilwe tiro e e thata go e dira. Noa o tshwanetse a bo a ne a tletse kutlo-botlhoko fa a itse gore baagelani nae ba tla senngwa. Mme re itse gore ga ba a ka ba reetsa tlhagiso ya gagwe. Gongwe ba ne ba tshega ba sotla Noa fa a ne a simolola go aga mokoro wa gagwe o motona. Noa o ne a tshwaregile a dira se Modimo O mmoleletseng go se dira.

Lefatshe le ne le omile fa Noa le bo-morwawe ba ne ba tswela kwa ntle go rema ditlhare. Lefatshe le ne le santse le omile fa ntlo e e kokobalang e ne e fedile mme diphologolo le dijo di ne di bolokesegile mo-teng. Go fitlhelela letsatsi leo, lefatshe le ne le nosiwa ke meuwane. *“Mme go ne go ise go nne le setlhatshana sepe sa naga mo lefatsheng, le gone go ne go ise go tlhoge morogo ope wa naga: gone Jehofa Modimo o ne a ise a nese pula mo lefatsheng, e bile go ne go sena motho ope yo o ka lemanang*

lefatshe; mme ga tlhatloga mouwane mo lefatsheng wa nosa mmu otlhe” (Genesis 2:5-6). Go ne go ise go ke go nne pula. Fa sengwe le sengwe se ne se siame, Noa le ba ntlo ya gagwe ba tsena mo ntlong e e kokobalang. Ba dumetse tsholofetso ya Modimo ya poloko. Ba dumetse gore pula e tla tla. Ba dumetse gore lefatshe le le omileng le tla khurumediwa ke metse. Fa ba ne ba le mo-teng, Modimo Wa tswala kgoro ya ntlo e e kokobalang. *“Mme tse di tsenyeng, tsa tsena e le tona le namagadi tsa nama yotlhe fela, jaaka Modimo o mo laotse, mme Jehofa a mo tswalela mo teng”* (Genesis 7:16). Ope o ne a se kake a tswela kwa-ntle. Go ne go sena ope gape yo o ka tsenang mo-teng.

(Balela tlelase Genesis 7:11-24.)

MORWALELA

Batho ba tshwanetse ba bo ba ne ba tshaba fa maru a dikgadima a ne a kokoana le marothodi a magolo a pula a simolola go na. Ba simolotse go gakgamala gore a Noa o ne a buile boammaaruri. Ba simolotse go akanya gore gongwe ba kabo ba ne ba dumela Modimo. Dikeletso tsa bone tsa boikepo di ngotlegile go tlhokega, jaaka metsi a ne a simolola go tlhatloga. Mme go ne go setse go le morago ga nako thata.

Pula e nele ka malatsi a le masome a mane le masigo a le masome a mane. *“Dithoba tsa magodimo tsa bulega”* (Genesis 7:11) go fitlhelela le eleng dithaba tse di kwa godimo di khurumeditse ke metsi. *“Mme nama yotlhe e e tsamayang mo lefatsheng ya swa”* (Genesis 7:21). Bosula jotlhe bo ne bo ile. Mme Noa le ba ntlo ya gagwe ba ne ba bolokesebile mo ntlong e e kokobalang. Ba ne ba dira thata ba tlhokometse diphologolo. Ba ne ba tshwanetse go emela lefatshe go oma nako e telele. Jalo Modimo O ba boleletse go tswa mo ntlong e e kokobalang. Modimo O ne Wa simolola lefatshe gape ka motho yo o ne a o ikanya le go O obamela.

Le eleng gompiano batho ba ba itseng ba fitlhela bosupi jwa go supa gore go ne go na le morwalela o o boitshegang mo malatsing a pele a lefatshe. Dipolelo tsa batho ba bogologolo go tswa mo tikologong ya lefatshe di bolela ka nako e ka yone Modimo O sentseng lefatshe ka metsi.

Mme batho ba lefatshe ba lebege ba tshwana fela. Ba santse ba na le tshwanelo ya go tlhopha tsela ya bone. Ba tlhophile ditsela tse di bosula tse di sa itumediseng Modimo. Ba logile maano a ditsela di le dintsi tse di farologanyeng go leka go itumedisa Modimo ka ditumelo tse di farologanyeng. Mme ba se-kaenyana fela ba dumela gore ka go ikanya Modimo le go dumela mo go One mo dipelong tsa bone, ba tla bolokwa. Ba

santse ba sa dumele thero ya lefoko la Modimo. Mme jaaka Noa, re tshwanetse go rera lefa go ntse jalo. Re tshwanetse go tsamaya le Modimo. Re tshwanetse go bolelela bakaulengwe ba rona kaga lorato lwa Modimo.

(Balela tlelase Genesis 8:15-22.)

KGOLAGANO E NTŠHA

Mo go Genesis re bala gore Modimo O dirile kgolagano le Noa. Morwalela o ne o fetile. E ne e le nako ya go tswelela pele le go simolola gape. Noa o ne a itumeletse go tshela. O ne a lebogela poloko ya ba lelwapa la gagwe. O ne a itumeletse gore Modimo O ne O tlhakanetse leano la One le ene. Mme o ne a itumeletse gore o obametse Modimo. Noa o lebogile Modimo ka go O naya setlhabelo mo kobamelong.

(Balela tlelase Genesis 9:8-13.)

Modimo O dirile kgolagano gongwe tsholofetso e ntšha le Noa. O boleletse Noa gore ga O ketla O tlhola O senya lefatshe ka metsi. Modimo O file Noa sesupo se ka sone Noa o ka gakologelwang tsholofetso ya One. Sesupo sa kgolagano se ka bonwa ke dilo tsotlhe tse di tshelang. E ka nna segakolodi sa gore Modimo O ka tshegetsatsa tsholofetso ya One. Sesupo se e ne e le motshe wa godimo. O ka bonala mo loaping morago ga pula. O ka raya gore Modimo ga O ketla O senya lefatshe gape ka morwalela.

DILLO TSA GO DI GOPOLA

A re akanyeng kaga dingwe tsa dilo tse Noa o di dirileng. Noa o rutile bana ba gagwe kaga Modimo. Le rona jaaka Bakeresete re na le boikarabelo jo bo tshwanang. Re dikai tsa mofuta wa motho yo Modimo O re batlang re nna ene. Bana ba rona ba tshwanetse go kgona go re ikanya, mme ba tle mo go rona ka mathata a bone.

Noa o ne a eletsa go nna mofuta o o pharologanyo wa motho. O itsile se se ne se siame fa pele ga Modimo mme a se dira. Go ne go sena ope wa baagelani le ene yo o dumelaneng le ene, mme Noa o itsile gore Modimo O laotse sengwe le sengwe. Baagelani le ene ba ne ba se kake ba laola le dlang matlo a bone sentle. Noa o latetse le go ikanya Modimo.

Noa o buseditse Modimo dingwe tsa dithoto tsa gagwe. Fa a ne a tswa mo ntlong e e kokobalang, bontsi jwa dijo tsa gagwe bo ne bo jelwe. Mme o ne a ikanya Modimo go mo tlhokomela. Jalo o file Modimo karolo ya dithoto tsa gagwe go leboga.

SE THUTO E E SE RE RUTANG

1. Go ikanya Modimo go tlisa botshelo. Go ikanya mo go rona go tlisa liso ka ntlha ya sebe se se re laolang.
2. Modimo O na le thulaganyo ya motho mongwe le mongwe yo o dumelang mo go One mme a O ikanya.
3. Modimo O tla tshegetsa di tsholofetso tsa One. Modimo ga O kake Wa tlola lefoko la One.
4. Modimo O re batla go ikanyega le rona. O re batla go tshegetsa ditsholofetso tsa rona ka metlha.

GO YA KWA MODIMO O GOGELANG TENG

DIKWALO TSA GO ITHUTA KWA GAE: Genesise 11:26 - 12:20.

DIKWALO TSA THUTO YA GOMPIENO: Genesise 12:1-9.

TEMANA YA TLHOGO: *"Ka tumelo Aberahame, e rile a bidiwa a utlwa, a fuduga a ya kwa felong fa o ne a tla go amogela go nna boswa; mme a tswa fela, a sa itse kwa o yang gone"* (Bahebera 11:8).

Modimo O na le leano la motho mongwe le mongwe. Mme re bone mo polelong ya ga Adame le Efe gore batho ba filwe nonofo ya go tlhopha. Ke ka gore Modimo O ratile motho gore O bo O mo file tshiamelo ya go tlhopha. O batla re tlhopha go O ikanya le go O rata. Modimo O ka tshegetsatshe motho mo go direng ditlhopho tse di phoso ka go tlosa kgololesego ya gagwe ya tlhopho. Mme seo e ne e se mofuta wa botsalano jo Modimo O bo batlileng.

Beke e e fetileng re ithutile polelo ya ga Noa. Noa o ne a dumetse Modimo. O dumetse gore morwalela o etla. Noa o obametse Modimo mme ene le ba ntlo ya gagwe ba ne ba bolokwa. Noa o ne a latela leano la Modimo.

Mo thutong e re utlwa kaga monna yo o bidiwang Aberame. Aberame o ntse mo gare ga batho ba baheitene. Batho ba malatsi a ga Aberame gangwe le gape ba ne ba dirisa kgololesego ya bone go tlhopha mo tseleng e e phoso. Modimo O ne O na le leano go tliša poloko mo mothong. Go ne go ka tsaya dingwaga tse dintsi. Mme leano la Modimo le ne le na le tshimologo. Aberame e ne e le karolo ya leano la Modimo. Fa Modimo O biditse Aberame, Aberame o ne a dumela go latela leano la Modimo.

(Balela tlelase Genesise 12:1-9.)

MODIMO O BIDITSE ABERAME

Baebele ga e re bolelele gore Aberame o itsile Modimo jang. Re gopola gore dipolelo tsa bo Adame le Efe. Kaene le Abele, le Noa di ne di feta go tswa mo go rre go ya go morwa. Rre mongwe le mongwe o ne a ruta morwawe maina a bo-rragwe-mogolo. E tshwanetse ya bo e ne e le ka tsela e gore Aberame a bo a itsile kaga Modimo.

Fa Modimo O ne O ipaakantse go simolola leano la One, O buile le Aberame. Bala temana 1 gape. Aberame o ne a bolelelwa go dira dilo dingwe tse di thata. O ne a bolelelwa go tlogela lefatshe la gagabo. O ne

a tshwanetse go tlogela ba gagabo, mme o ne a tshwanetse go tlogela ntlo ya ga rragwe. Se e ne e le selo se se thata. Motho yo o humanegileng go feta botlhe mo Afrika ke yo o senang losika gaufi.

Modimo ga O Wa ka Wa bolelela Aberame le eleng kwa o ne a tshwanetse go ya gone. Aberame o ne a bolelelwa go simolola mosepele wa gagwe. Modimo O rile O tla mo etelelepele le go mo goga. A o ka gopola gore go tshwanetse ga bo go ne ga nna jang fa Aberame a boleletse mosadi wa gagwe le batlhanka go baakanyetsa mosepele? Kwantle ga pelaelo mongwe le mongwe o batlile go itse gore ba ya kae. Aberame o ne a ka araba fela a re, "Ga ke itse. Modimo O tla ntshupetsa morago." Aberame o ne a ikantse Modimo. Aberame a obama.

DITSHOLOFETSO TSA MODIMO MO GO ABERAME

Bala Genesisise 12:2-3 gape. Modimo O ne Wa solofetsa Aberame dilo di le dintsi fa a ne a ka obamela taolo ya Modimo. Modimo O boleletse Aberame dilo di le tlhano tse Modimo O ka di dirang.

1. Modimo O ne O ka dira morafe o mogolo wa losika lwa ga Aberame.
2. Modimo O ne O ka segofatsa Aberame. O ne O ka mo sireletsa le go mo thusa.
3. Modimo O ne O ka dira leina la ga Aberame legolo.
4. Modimo O ne O ka dirisa Aberame go segofatsa batho ba bangwe. Se se ne se lebagane le leano la Modimo go tlisa kgololo mio mothong.
5. Modimo O ne O ka segofatsa batho ba ba segofaditseng Aberame. Mme gape O ne O ka futsa mongwe le mongwe yo o futsitseng Aberame.

ABERAME O OBAMETSE MODIMO

Aberame o ne a na le kgololesego go tlhophla. O ne a kabo a ntse kwa gae. O ne a kabo a ikutlwile a bolokesegile le ba ntlo ya gagwe ba mo dikologile. O ne a kabo a tshedile botshelo jwa gagwe mme a swa mme re kabo re ise re ke re utlwe kaga gagwe. Aberame o kabo a fositse tshagofatso ya Modimo. O kabo a ntse fela le mofuta wa botshelo jo o ne a bo ithulaganyeditse.

Mme Aberame o ikobetse Modimo. Bala Genesisise 12:4-6 gape. Setlogolo sa ga Aberame, ebong Lote, o tsamaila le ene. Sarai, mosadi wa gagwe, le ene a tsamaya. Botlhe ba batlhanka ba ga Aberame ba ne ba tsamaya. Aberame o ne a tsaya diruiwa tsa gagwe, le dithoto tsa

gagwe tsotlhe. Mme o ne a se kake a tsaya lefatshe. O ne a se kake a tsaya lefelo la go lema dipeo tsa gagwe. O ne a ikantse Modimo go mmabalela.

Aberame o ne a simolola mosepele wa gagwe. Ba ne ba tshwanetse go tswelela ka bonya fa ba tsamaya mo tseleng. Gongwe ba ne ba na le megope e bofeletswe mo mekotleng ya diphologolo. Ba ne ba tshwanetse go batlela diphologolo metsi le bojang. Dinako dingwe ba ne ba tshwanetse go reka dijo mo bathong ba ba ne ba nna mo lefatsheng le ba ne ba feta mo go lone. Mme ka nako e yotlhe Aberame o ne a tswelela pele ka gore Modimo O ne O sa mmolelela go ema.

MODIMO O DIRETSE ABERAME TSHOLOFETSO E NNGWE

Modimo O gogile Aberame kgato e le nngwe-fela ka nako. Morago ga Aberame a sena go goroga kwa Kanana, Modimo O ne Wa mo direla tsholofetso e nngwe. Pelo ya Modimo e ne e itumedisitse ke boikobo jwa ga Aberame. Pelo ya ga Aberame e ne e ipaakanyeditse go reetsa fa Modimo O buile.

Bala Genesisise 12:7 gape. Jehofa a bonala kwa go Aberame. Go ne go na le boikanyego fa gare ga bone. Jalo Modimo Wa bonala kwa go Aberame mme Wa dira tsholofetso e ntšha. Modimo Wa solofetsa go naya Aberame le dikokomana tsa gagwe lefatshe le le bidiwang Kanana. Ka nako eo, Aberame o ne a godile go feta dingwaga tse 75. Mme o ne a sena morwa. Mme Aberame ga a ka a gakolola Modimo kaga se. Aberame o ne a tswelela go dumela mo Modimong. O ne a aga sebeso mme a obama. Gongwe o ne a dira setlhabelo ka kgomo. Jaaka Noa, Aberame o ne a ikanya Modimo go mmabalela mme o ne a sa tshabe go abela Modimo dingwe tsa dithoto tsa gagwe jaaka kabelo ya tebogo. Sebeso e ne e le segakolodi mo go Aberame gore Modimo O ne Wa bonala kwa go ene. Nako le nako fa a ne a feta sebeso o gakologetswa tsholofetso ya Modimo.

BOTSALANO JWA GA ABERAME LE MODIMO

Aberame o tsamaetse kwa pele go se-kae. Mme a tlhoma megope ya gagwe. Batho ba ne ba ka itapolosa mo mosepeleng wa bone. Diphologolo di ne di ka itapolosa. Aberame o ne a eme mo dithabeng. Gongwe go ne go na le metsi gaufi. Nakonyana e khutshane Aberame le ba lelwapa la gagwe ba ne ba na le legae. Bala Genesisise 12:8 gape.

Nako e yotlhe Aberame o ne a gakologelwa Jehofa Modimo. Mafoko a Modimo a tshwanetse a bo a tsile mo dikakanyong tsa gagwe gantsi. Sephiri sa botshelo jwa Aberame se se itumedisitseng Modimo e ne e le

gore o obametse Modimo gantsi. Aberame o ne a tlhoma megope ya gagwe. Jalo Aberame a aga sebeso. Aberame o ne a bitsa leina la ga Jehofa. Aberame o obametse Modimo mme o file Modimo lobaka lwa go bua le ene.

Mme Modimo ga O a bua le Aberame gape ka nako eo. Modimo O ne O rile, "Ke tla naya dikokomana tsa gago lefatshe le." Kabelo e ne e ka nna ya ga Aberame mo malatsing a a tlang, mme go ne go ise go nne. Bala Genesis 12:9. Modimo ga O a bolelela Aberame go ema. Jalo Aberame a tswelela.

Bala temana ya tlhogo ya gompieno. Re bolelelwa gape gore Aberame o utlwile tsholofetso ya Modimo. Aberame o ne a sa itse gore o ne a ya kae. Mme o ne a tlogela legae a obamela Modimo. Aberame o ne a sa bolelelwa lefelo la gagwe la go ema. Modimo O mo gogile kgato e le nngwe ka nako.

DILO TSA GO DI GOPOLA

Fa re bala pampiri ya dikgang gongwe re utlwa dikgang mo seromamoweng, re utlwa kaga batho ba ba tlhophang phoso. Batho bangwe ba batla dithoto tse dintsi mme ba leka go nna le tsone ka go utswa. Bangwe ba batho ba ga ba palelwe ke go itumelela khumo e fela, ba latlhegelwa ke sengwe le sengwe ka go ya kgolegelong. Bao ba sa tshwarwang ba tshwanetse go tshela ka letshogo. Ba gakgamala letsatsi le letsatsi fa mongwe a tla bona le gore ba tla otlhaiwa leng. Molato le poifo di mo dikgopolong tsa bone letsatsi le letsatsi. E ke yone fela nngwe ya ditsela e ka yone batho ba ka tlhophang tsela e e phoso.

Modimo O solofeditse Aberame masego le tumo le losika lo logolo. Tse ke dilo tse batho ba di batlang le e leng gompieno. Re tshwanetse go dira. Re tshwanetse go ba bolelela gore Modimo O tla thusa go kopantsha letlhoko la rona lotlhe. Modimo O na le leano la motho mongwe le mongwe. Mme re tshwanetse go O rata, go O ikanya le go O obamela gore re tle re amogele masego a.

SE THUTO E E SE RE RUTANG

1. Modimo O ka re segofatsa fela fa re O tlotla.
2. Re tshwanetse go O obamela le go O rapela gantsi.
3. Modimo O tla re babalela le letlhoko la rona, fa re O ikanya go dira jalo.

GO KGARATLHA LE PELAELO

DIKWALO TSA GO ITHUTA KWA GAE: Genesisise 15:1 - 18:15.

DIKWALO TSA THUTO YA GOMPIENO: Genesisise 17:1-8, 15-19.

TEMANA YA TLHOGO: *“Tshegofatso ya me e go lekanye, gonne thata ya me e lekanyediwa mo bokoeng”* (2 Bakorintha 12:9).

Re gakologelwa Aberame jaaka motho wa tumelo. Aberame o obametse Modimo ka go tlogela legae la gagwe mme a tsamaya mosepele o mo telele. Aberame o ne a ikantse Modimo go mo etelapele. Aberame o ne a dirile dithopho dingwe tse di tlhokegang. O ne a tlhophile tsela e e siameng mme a latetse Modimo. Mme Aberame o ne a na le dithopho tse dingwe di le dintsi go di dira. Dinako dingwe Aberame o ne a sa lete Modimo go mo goga. Dinako dingwe Aberame o ne a dira dithulaganyo tsa gagwe. Dinako dingwe Aberame o ne a belaela gore Modimo O ne O le gaufi go mmabalela. Aberame o ne a ithuta go tshela ka tumelo.

Modimo O ne Wa letla Aberame go kgaratlha le pelaelo. Aberame o ne a gola mo tumelong ya gagwe mo Modimong. Aberame o ne a ithuta gore tsela ya gagwe ka bo-ene gantsi e ne e tlisa mathata. Mme tsela ya Modimo e tlisitse masego. Aberame o ne a ithuta go dirisa kgololesego ya gagwe ya tlhopho go tlhophisa tsela ya Modimo mo tumelong.

(Balela tlelase Genesisise 17:1-8, 15-19.)

DITAOLO LE DITSHOLOFETSO TSA MODIMO

Modimo O dirile kgolagano gongwe tumelano le Aberame. Modimo O buile le Aberame kaga tumelano e, e e fa gare ga bone gantsi; jaaka mo go Genesisise 12:1-3 le Genesisise 15:18. Mo tumelanong e, bobedi jwa bone Modimo le Aberame ba ne ba tshwanetse go dira dilo dingwe. Modimo O boletse Aberame gore One ka Bo-One O tla dira eng. Aberame o supile kamogelo ya gagwe ka ditiro tse gagwe. Mme Modimo Wa tshegetsatsa ditsholofetso tsa One.

Modimo O ne O na le maikaelelo mo kgolaganong ya One le Aberame. Modimo O batlile go supetsa motho gore E ne E le mang. O batlile go bontsha Aberame gore E ne E le Modimo Mothatayotlhe. O ne O tlhodile lefatshe. O ne O tlhodile motho. O laotse dilo tsotlhe mme O ntse le nonofo yotlhe. O ne O na le leano la go busetsa motho mo seemong sa botsalano le One. O batlile go segofatsa batho botlhe. Mme

Modimo O boleletse Aberame gore Modimo O tla segofatsa Aberame fa a O obamela. Aberame o ne a tshwanetse go thusa go anamisa leano la Modimo la go segofatsa batho botlhe.

Bala ditemana 1-6. Modimo O boleletse Aberame gore a dire eng. O batlile Aberame go "tsamaya fa pele" ga One. Fa re tsamaya fa pele ga Modimo, O ka bona ditiro tsa rona tsotlhe le go itse dikgopolo tsa rona tsotlhe. Mo ditirong tsa gagwe, Aberame o ne a "sena molato." Ope a seka a kgona go bona phoso epe mo ditirong tsa ga Aberame. Modimo O batlile Aberame go gola mo tumelong go fitlhelela ditiro tsa gagwe tsotlhe di itumedisa fa pele ga Modimo.

Bala ditemana 2-6 gape. Fa gape re fitlhela ditsholofetso tsa Modimo mo go Aberame. Tse e ne e le dilo tse Modimo O dumelaneng go di dira. Gape Modimo O solofeditse go dira Aberame rra merafe e mentsi. Le eleng leina la ga Aberame le ne la fetolwa. Aberame o ne a nna Aberahame. "H" e kaile go-hema ga Mowa wa Modimo O tla mo godimo ga Aberame. O ne a tla nna le botsalano jo bo pharologanyo e e feletseng le Modimo. Bangwe ba dikokomana tsa ga Aberahame ba ne ba tla nna le eleng dikgosi tsa morafe o moša o o ne o tla nna mo thulaganyong ya ga Aberahame.

KGOLAGANO E E SA KHUTLENG

Mo tiragalong e ya boraro fa gare ga Modimo le Aberahame, Modimo Wa tlisa kgopolo e ntšha. (Bala Genesis 17:7-8.) Kgolagano e e ne e se ketla e fela fa Aberahame a sule. E ne e tshwanetse go nna tsholofetso le eleng mo baneng ba ga Aberahame le ditlogolo le go ya bosakhutleng. E ne e le kgolagano e e sa khutleng.

Mo temaneng ya bo 8, Modimo O boeletse tsholofetso ya One go naya Aberahame lefatshe la Kanana. Lefa go ntse jalo, ka nako eo lefatshe le ne le tletse batho ba bidiwa Bakanana. E ne e se bana ba ga Aberahame. E ne e le lefatshe la ga Aberahame, mme o ne a ise a nne le bana go le tlatsa. Fa dikokomana tsa ga Aberahame di ne di atile, ba tsene go batla lefatshe le e ne e le boswa jwa bone.

Aberahame o utlwile ditsholofetso tsa Modimo. O dumetse mo pelong ya gagwe go dira karolo ya gagwe. O dumetse go ruta bo-morwawe kaga kgolagano le kaga go se nne molato fa pele ga Modimo. Aberahame o dumetse gape go latela leano la Modimo, lefa a ne a sena ngwana le lefatshe le ise le nne la gagwe. O ne a eletsa go latela Jehofa, kgato e le mngwe-fela ka nako. Jehofa O ne A tla nna Modimo wa gagwe. Batho ba gagwe e ne e tla nna batho ba Modimo.

TSHOLOFETSO YA MODIMO YA NGWANA WA MOSIMANE

Modimo O solofeditse Aberahame gore o tla nna le dikokomana di le dintsi. Ka nako e Aberahame o ka ne a ne a na le dingwaga di le 100. Nako ya ntlha fa Modimo O solofeditse Aberahame, selo se, o ne a setse a na le dingwaga di le masome a supa le botlhano.

Dingwaga di le dintsi di ne di fetile. Aberahame le Sarai ba ne ba gakgamaletse tsholofetso ya Modimo. Go ne go sa siamela mosadi go nna a sena bana. Sarai o ne a kopile Aberahame go nyala lelata la gagwe, Hagare. Ka gonne Hagare e ne e le lelata la ga Sarai, bana ba ga Hagare ba ne ba tla nna ba ga Sarai. Sarai o gopotse gore o ntse le leano le le siameng. Aberahame o ne a dumela leano la ga Sarai. Mme Hagare a nna moimana.

E ka ne e le ka bonako Sarai utlwa-botlhoko ka go tsweledisa leano la gagwe ka sebele. Hagare o ne a ntse a le lelata fela. Jaanong e ne e le mosadi yo o nyetsweng yo o moimana. O ne a ikgaintsha. Hagare a simolola go bua mafoko a a sa itumediseng Sarai. Sarai le Aberahame ba ne ba fela-pelo, mme ne ba leka go tsweledisetsa Modimo thulaganyo ya One. Aberahame o ratile morwawe, Ishemaele. Mme Ishemaele e ne e se morwa yo o solofeditsweng, Modimo O ne O se kake Wa mo amogela jaaka moemedi wa yo o Mo solofeditse. Ishemaele e ne e le mosimane, yo o tsetsweng ka dipelaelo tsa ga Sarai le Aberahame, gore Modimo O ne O eme thata lobaka lo fetile lwa go tshegetsa tsholofetso ya One mo go bone.

Ka nako ya tiragalo ya boraro ya kgolagano, Modimo gape Wa gatelela gore Aberahame le Sarai bone ka sebele ba tla nna le ngwana wa mosimane. Go tlhomamisa tsholofetso e gape, leina la ga Sarai le ne la fetolelwa kwa go Sara. Gape re bone gore go ne go na le botsalanong jo bo feletseng gotlhe-gotlhe.

PELAELO YA GA ABERAHAME

Aberahame o utlwile Modimo O dira tsholofetso e gape. A akanya dingwaga tsa gagwe. A akanya dingwaga tsa Sara. Aberahame o itsile gore go ne go sena tsela ya setho gore tsholofetso ya Modimo e ka diragala tota. Aberahame o lebetse gore Modimo O tlhodile lefatshe. O lebetse gore Modimo ka Bo-One O ne O dirile dithulaganyo tsotlhe tsa lefatshe, le ditsela tsa mekgwa tse dilo di diregalang mo go lone. Modimo O dirile nako ya go lema le nako ya go roba. Modimo O rometse pula me Wa phatsimisa letsatsi. Mme Modimo O ka dira monnamogolo yo o dingwaga di 100 le mosadimogolo yo o dingwaga di 90 go nna le ngwana.

(Balela tlelase Genesis 17:15-19.)

Jalo Aberahame a wela fa fatshe ka sefathlogo mme a tshega ka gonne o ne a lebetse gore o ne a bua le Modimo Mothatayotlhe. O ne a gakologelwa dingwaga tsa gagwe fela. Jalo a kopa Modimo go amogela moemedi wa ngwana wa mosimane yo ene le Sara ba mo rulaganyeditseng.

KARABO YA MODIMO MO PELAE LONG

Mme Modimo Wa re, *“Nnyaa, mme Sara mosadi wa gago o tla bona ngwana wa mosimane, mme o tla mo raya leina o re Isake.”*

Modimo ga O a boelela tsholofetso ya One go le gosi. O bile O file Aberahame leina la ngwana wa mosimane. Modimo O ne O se ketla O amogela thulaganyo ya ga Aberahame. Aberahame o ne a tshwanetse go amogela thulaganyo ya Modimo. Modimo O gakolotse Aberahame gore Modimo ke One fela O O ne O laola. Ka nako e Sara o ntseng le ngwana wa mosimane, go ne go sena pelaelo ka gone. Ngwana wa mosimane o ne a tswa kwa Modimong. Ga go na ope yo o kabo a kile a beela kwa thoko molao wa Modimo wa tlhologo fa ese Modimo ka Sebele.

DILO TSA GO DI GOPOLA

A nako nngwe o dira jaaka Aberahame a dirile? A o bona letlhoko lengwe mme o leka go ithulaganyetsa go le ithokomelela? Modimo O re solofela go tsaya Baebele mme re rulaganye matshelo a rona kafa dithutong tsa ga Jesu. Mme go na le dinako tse Modimo O re solofelang go O ikanya go dira dilo tse re se kakeng ra di itirela.

Ga re kake ra rulaganyetsa poloko ya rona le go-ema sentle fa pele ga Modimo. E ke neo e Jesu Keresete o re e lebagantseng. Ga re kake ra itse bo-kamoso ka metlha le gore re rulaganye jang. Mme Modimo O tla re goga kgato e le nngwe ka nako. Re tshwanetse go rapela gantsi mme re bale Baebele. Jalo re tlaabo re ipaakanyeditse go reetsa fa Modimo O bua.

Re tla gola ka thata e tona mo tumelong ya rona fa re gopola kaga dipelaelo tsa rona mme jalo re dumele.

Ithute ka tlhogo temana ya tlhogo gore o bue o le nosi fa o raelesega go belaela ditsholofetso tsa Modimo.

SE THUTO E E SE RE RUTANG

1. Re tshwanetse go ithuta go ikobela Modimo le go O ikanya go re goga letsatsi le letsatsi.
2. Modimo O pelotelele le rona lefa re sa dire se O batlang re se dira.

3. Modimo ga O fetole dithulaganyo tsa One go lekanya dithulaganyo tsa rona. Dithulaganyo tsa Modimo di tla tsweledisiwa kafa thulaganyong ya One.
4. Tumelo ya rona e tla nonofa segolo jaaka re fenya dipelaelo tsa rona. Fa re ithuta go ikanya Modimo bogolo thata, tumelo ya rona e nonofa thata.
5. Re tshwanetse go ikanya Modimo go re etelelapele letsatsi le letsatsi mo boemong jwa go itirela dithulaganyo tsa rona.

GO ABA SE MODIMO O SE KOPANG

DIKWALO TSA GO ITHUTA KWA GAE: Genesise 22:1-19.

DIKWALO TSA THUTO YA GOMPIENO: Genesise 22:1-13.

TEMANA YA TLHOGO: *“Ka tumelo Aberahame, e rile a lekwa, a isa Isake tshupelo: Ee, ene yo o ne a amogetse dipolelo tsa tsholofetso ka boitumelo, o ne a re o isa morwawe yo o tsetsweng a le esi tshupelo”*
(Bahebera 11:17).

Modimo O tlhophile Aberahame go ithuta kaga Modimo. Mo thutong ya rona ya bofelo Aberahame o ithutile sengwe kaga nonofo ya Modimo. Aberahame o ithutile gore Modimo O ka dira se O se solofeditseng lefa se ne se lebege se sa kgonege mo bathong.

Modimo O ne O ruta Aberahame go O ikanya. Aberahame o ne a tshegile fa Modimo O rile ene le Sara ba tla bona ngwana. Mme Aberahame o ne a sa tshege ka go se-dumele fa Sara a ntse moimana. Boo-babedi ba ne ba tletse boitumelo. Mme fa ngwana wa bone wa mosimane a tsetse, ba mmiditse Isake. Isake e ne e le morwa wa kgolagano, yo Modimo O mo solofeditseng.

Maikaelelo a Modimo a go itshenolela Aberahame e ne e le go ruta Aberahame gore Modimo e ne e le mang. Modimo O batlile morafe wa batho go O sala morago. Morafe o o tlhokile rraone yo o dumetseng mme a ikanya Modimo. Modimo O ne O goga Aberahame kgato ka nako. Modimo O rometse ngwana wa mosimane yo o solofeditsweng. Aberahame o rutile Isake kaga kgolagano. Botsalo jwa ga Isake bo ne bo raya gore Aberahame o tla nna le dikokomana tse dingwe. Aberahame o gopotse tsholofetso ya Modimo nako le nako fa a leba Isake.

Mme gongwe tumelo ya ga Aberahame e ne e ise e gole. Gongwe go ne go santse go na le dinako tse Aberahame o ne a belaela gore tsela ya Modimo ke yone e ne e siame thata. Modimo O ne O na le teko e le nngwe-fela ya bofelo ya ga Aberahame. O batlile go bona gore a Aberahame o ne a ipaakantse gotlhe-gotlhe go latela Modimo ka dinako tsotlhe.

(Balela tlelase Genesis 22:1-13.)

MODIMO O LEKILE ABERAHAME

Bala Genesis 22:1-2. E ke polelo ya teko ya ga Aberahame. Mo tekong mo sekolong, re tshwanetse go neela dikarabo tse di siameng gore re fenye. A Aberahame o ne a tla fenya teko e? Modimo O batlile go itse gore a Aberahame e ne e le yo o tla nnang karolo ya leano la One mo mothong.

Se e ne e le selo se se thata se Modimo O kopileng Aberahame go se dira. Botshelo jwa ga Aberahame jotlhe fa e sale a ne a simolotse mosepele wa gagwe wa ntlha ka taolo ya Modimo, e ne e le boiteko jwa gagwe go diragatsa karolo ya gagwe ya kgolagano. Modimo O rometse Isake. Aberahame o ne a ka bona gore Modimo O ne O tsheditse karolo ya One ya kgolagano.

Jaanong Modimo Wa laola Aberahame go dira setlhabelo ka Isake. Baagisani ba baheitene ba ga Aberahame ne ba isetsa medimo ya bone ya seheitene setlhabelo ka bana ba bone. Jalo e ne e se mokgwa o o gakgamatsang ka malatsi ao. Go ne go sa tlwaelesaga mo kobamelong Modimo. Gale go ne go isiwa setlhabelo ka konyana.

Aberahame o ratile Isake. Isake e ne e le ngwana wa mosimane yo o solofeditsweng ke Modimo mme a tsetswe ka kgakgamatso. Isake o ne a tshwanetse go tsweledisana kgolagano le Modimo morago ga loso lwa ga Aberahame. Bo-morwa Isake ba tla nna batho ba Modimo. Go tshwanetse ga bo go ne go lebege mo go Aberahame gore Modimo O fetotse thulaganyo ya One. Aberahame o ne a se kake a bona gore kgolagano e tla diragalelwa ke eng. O ne a e tshotse jaaka maikaelelo a gagwe a botshelo jwa gagwe. Fa kgolagano e ne e ile le botshelo jwa ga Isake, botshelo jwa ga Aberahame jo bo fetileng le botshelo jwa gagwe jo bo tlang bo kabo bo sena maikaelelo.

NAKO YA TLHOPHO

Polelo ga e re bolelele gore dikakanyo tsa ga Aberahame e ne e le eng mo nakong e. Mme re itse gore jaaka kokomana ya ga Adame, Aberahame o ne a na le kgololesego go tlhopha. O tshwanetse go dira eng? A o tshwanetse go dira leano la gagwe le go leka go ipeela Isake? Gongwe a o tshwanetse go ikobela Modimo?

Bala ditimana 3 le 4. Fa Modimo O biditse, Aberahame o arabile. Fa Modimo O laotse, Aberahame o ikobile. Gongwe ka khutsafalo, o ipaakanyeditse go ya kwa thabeng e Modimo O tla mo e mo supetsang. Ka pelo e e bokete o bileditse Isake kwa go ene mme a thalosa gore ba ya kwa thabeng go isetsa Modimo setlhabelo. Re itse gore Aberahame o

obametse Modimo gantsi, mme se e ne e se mosepele o o gakgamatsang mo go Isake.

Aberahame le Isake le batlhanka ba tsamaile malatsi a le mabedi. Bala temana 5. Mo mosong wa letsatsi la boraro, Aberahame a bona thaba. Batlhanka ba leta. Aberahame le Isake ba tsaya dikgong le magala a a molelo a ba ne ba tla a tlhoka go dira molelo wa bone. Ba tsamaela kwa godimo ga thaba. Mme mo seatleng sa gagwe a tsaya thipa.

MO GODIMO GA THABA

Aberahame le Isake ba ne ba palama thaba. Morago ga nako Isake a simolola go bona selo se se gakgamatsang. O ne a tlwaetse mesepele e e ntseng jaana. O ne a simolotse go ithuta kaga Modimo. O ne a itse kaga kobamelo le setlhabelo.

“Rra!” o buile jalo.

“Ke fano, morwaaka”, go arabile Aberahame.

Isake o rile, “Ke bona molelo le dikgong, mme konyana ya setlhabelo e kae?”

Aberahame o ne ka re’ng?

“Modimo O tla ipatlela konya ya tshupelo ya phiso, morwaaka.” Mafoko a ga Aberahame a ne a le boammaaruri. O itsile mo go feteletseng.

Isake o ne a amogela karabo e. O ne a rutilwe gore Modimo O laotse lefatshe lotlhe. Fa Modimo O ne O ka dira go tsalwa ga gagwe, ka boammaaruri Modimo O ne O ka batla konyana!

Aberahame o ne a tla kwa lefelong la setlhabelo. Mmogo ene le Isake ba rulaganya dikgong. Molelo o no o le gaufi. Mme jalo nako ya tla kwa go Aberahame go tlhalosetsa Isake gore e ne e le ene konyana.

Ga re itse gore Aberahame o ikutlwile jang. Ga re itse gore Isake o ikutlwile jang. Mme Isake o ikobetse rragwe ebong Aberahame jaaka Aberahame a ikobetse Modimo. Isake o ne a golegwa a bewa mo godimo ga dikgong. Jalo Aberahame a tsaya thipa a e tsholeletsa mo phefong. Aberahame o ne a ipaakanyeditse go dira setlhabelo le eleng ka morwawe yo o esi.

KONYANA YA MODIMO

Ka nako e Aberahame o ne a fentse teko. Modimo O itsile gore o ne a rata go ikoba le go ikanya mo botshelong jwa gagwe jotlhe, jo bo fetileng le jo bo tlang, go bo baya mo mabogong a Modimo. Jalo Modimo Wa boloka Isake mme Wa mmusetse kwa go Aberahame. O buseditse Aberahame maikaelelo le thulaganyo ya botshelo jwa gagwe. Boikanyo

jwa ga Aberahame bo ne bo feletse. O ne a ipaakantse go ya mo kगतong e e latelang mo thulaganyong ya Modimo ya botshelo jwa gagwe.

Aberahame a retologa mme a leba. Go ne go na le phelehu e tshwerwe mo ditlhareng. Modimo ruri O ne O baakantse phologolo. Ka boitumelo jo bogolo Aberahame a golola Isake. O ne a baya phelehu mo boemong jwa ga Isake mme a e isa setlhabelo. Jalo moengele wa ga Jehofa a boelela tumelano e Modimo O ne O dirile le Aberahame. Aberahame o ne a tla segofadiwa. Aberahame le Isake ba obametse Modimo. Ba boile ba fologa thaba mme ba tsamaela kwa gae mmogo.

Ka ntlha ya gore Aberahame a dumetse Modimo, o ikantse Modimo go rulaganyetsa botshelo jwa gagwe sentle. Jalo o ikobetse ditaolo tsa Modimo. Se se diretse Modimo tsela ya go segofatsa Aberahame. Aberahame o ne a huma thata. O ne a tuma thata. Ditumelo di le tharo, ebong, Sejuda, Sekeresete le Semahomede di lebile Aberahame jaaka rra-tsone wa se-mowa. Aberahame ga a a tlhokomela jaaka rra morafe o mogolo wa batho fela mo mebeleng (nameng), o na le dikokomana di le dintsi tse di mo salang morago ka go nna le tumelo mo Modimong.

DILO TSA GO DI GOPOLA

A o ikobela Modimo? O ka go segofatsa fela fa o O ikanya le go O obamela. A o ka eletsa go O neela botshelo jwa gago mme o itseela maikaelelo le thulaganyo ya One? Re tshwanetse go aba le eleng matshelo a rona fa e le se O se kopang. Re tshwanetse go eletsa go aba nako ya rona go abelana kaga Modimo le bakaulengwe ba rona. Re tshwanetse go eletsa go O busetsa dithoto tsa rona. Re tshwanetse go eletsa go ruta bana ba rona go O obamela le go O direla.

SE THUTO E E SE RE RUTANG

1. Modimo ga O ketla O raelela motho mo sebeng. Ga O kake.
2. Mme Modimo O tla leka boikanyego jwa rona mo go One le tumelo ya rona mo go One.
3. Jaaka re tshela ka tumelo ya rona letsatsi le letsatsi, re ruta bana ba rona go ikanya Modimo le bone.
4. Re batleng thulaganyo ya Modimo mo matshelong a rona mme jalo re ikanyeng Modimo gotlhe-gotlhe ka matshelo a rona.
5. Go-rata ga Modimo go ka gogela motho go dira ditlhabelo tse dikgolo ka ntlha ya ga Keresete.

“BO-NNA” GA BO A LEKANA

DIKWALO TSA GO ITHUTA KWA GAE: Genesis 25:19-34; 27; 29.

DIKWALO TSA THUTO YA GOMPIENO:

Genesis 25:29-34; 29:21-26.

TEMANA YA TLHOGO: *“O ikanye Jehofa ka pelo yotlhe ya gago, mme o seka wa ikaega tlhaloganyo ya gago fela”* (Diane 3:5).

Aberahame le Sara ba tshedile dingwaga di le dintsi morago ga Isake a tsetswe. Dingwaga tsa bone tsa bofelo di ne di tletse boitumelo ka gonne ngwana wa mosimane yo o solofeditsweng o ne a filwe ke Modimo. Isake o ne a tshwanetse go tsewedisa botsalano jwa kgolagano le Modimo. Fa Isake a ne a godile mo go lekaneng go nyala, Aberahame o itsile gore Isake o tla tlhoka mosadi yo o itsileng kaga Modimo mme a dumela mo go One. Isake le mosadi wa gagwe, mmogo, ba ka dira legae le mo go lone leano la Modimo le ka diragadiwang.

Aberahame o romile motlhanka wa gagwe yo o ikanyegileng thata, kwa morago kwa lefatsheng la gagabo (Aberahame) go batlela Isake mosadi. Motlhanka o ne a ithutile kaga Modimo mo go Aberahame. O rapetse Modimo wa ga Aberahame go mo goga mme Modimo wa mo etelapele go bona Rebeka go nna mosadi wa ga Isake.

Isake le Rebeka ba ne ba nyalane. Ba dirile legae mmogo. Isake o ne a ja boswa jwa khumo yotlhe ya ga Aberahame, diphologolo (diruiwa) tsotlhe le batlhanka le gauta. Isake e ne e le monna yo o humileng. Mme o ne a sa itumele. Isake le Rebeka ba ne ba leta Modimo go ba romela ngwana wa mosimane. Lwa-bofelo, Isake o rapetse Modimo mme o kopile ngwana wa mosimane. Mme Rebeka a nna moimana. Letsatsi lengwe Jehofa O buile le Rebeka. Modimo O mmoleletse gore o tla nna le mawelana a basimane. Bana ba gagwe ba basimane ba tla nna bathei ba ditshaba tsa baganetsani. O mmoleletse gape gore ngwana wa mosimane yo mmotlana o tla busa ngwana wa mosimane yo motona.

Mo malatsing ao ngwana wa mosimane wa ntlha o ne a na le maemo a a faphegileng. Ngwana wa mosimane yo motona o ne a amogela gabedi ga dikhumo tsa ga rragwe go feta bo-monnawe. Se e ne e le botsalwapele jwa gagwe. Ngwana wa mosimane wa ntlha gape o ne a amogela tshegofatso mo go rragwe. Tshegofatso le tshiamelo-ya-botsalwapele di supile gore ngwana wa mosimane yo motona o ntse mo maemong a ga rragwe yo o tsofetseng, jaaka tlhogo ya lelwapa. O tla nna le

boikarabelo jwa go goga lelwapa le go tlhokomela lelwapa. Mo lelwapeng la ga Isake go ne go na le kgolagano le Modimo. Jalo yo motona (ngwana) o ne a tla nna le boikarabelo mo Modimong go diragatsa tsholofetso e Aberahame o e diretseng Modimo, go O rata le go O direla.

Mawelana a ga Rebeka a ne a farologanye thata. Esau e ne e le yo motona. O ne a le boboa thata. O ratile go tsoma le go nna kwa-ntle. Jakobe e ne e le lewelana le le botlana. O ratile go nna mo gae. Isake le Rebeka ga ba a dira mmogo go ruta bana ba bone. Isake o ratile nama ya diphologolo tsa naga e Esau o e mo tliseditseng go ja. Rebeka o ratile Jakobe thata ka ntlha ya gore a ratile go nna le ene mo megopeng ya bone. Jalo basimane ba ne ba ithuta dithuto tse di farologaneng mo batsading ba bone.

Esau le Jakobe ba gola go nna banna. Lefa ba ne ba ithutile kaga Modimo mo batsading ba bone, ba ne ba sa akanye fa thulaganyo ya Modimo e tlhokega thata.

(Balela tlelase Genesis 25:29-34.)

JAKOBE O A IPAAKANYETSA

Pele ga mawelana a tsetswe, Modimo O ne O boletse Rebeka gore lewelana la ntlha le tla direle lewelana le lengwe. Rebeka o boletse Jakobe gore Modimo O buile eng. O (Rebeka) itsile gore go nna tlhogo ya ntlo, Jakobe o ne a tla tlhoka botsalwapele go nna jwa gagwe. Gongwe Rebeka le Jakobe ba buile kaga gore botsalwapele bo ka tsewa jang. Maano a a ne a le mo dikgopolong tsa ga Jakobe. O ne a sa ikanye Modimo go tsweledisa leano la Modimo la sebele.

Letsatsi lengwe Jakobe o ne a apeile mo gae. O ne a apeile dinawa. Esau o tsile a tswa go tsoma. Gongwe o ne a tsamaile malatsi a le mantsi ka dijo di le dinnye le metsi a le mannye. O kabo a ne a belege nama (ya diphologolo) go tswa kgakala. O ne a lapile thata. Fa a atametse legae, Esau a nka dijo tsa ga Jakobe. Esau a kopa Jakobe go mo fa dijo. Jakobe a bona gore Esau o ne a tshwerwe ke tlala thata. Jalo Jakobe ka bonako a dira leano la go leka go itseela botsalwapele.

Jakobe o rile, "Ke tla go fa dijo fa o ka mpha botsalwapele jwa gago."

Gongwe Jakobe o ne a gakgamala gore Esau a dumetse ka bonako. Jakobe a gatelela gore Esau a ikanne go mo fa botsalwapele. Kwa-ntle ga maikano a, Esau o kabo a ipuseditse botsalwapele morago (ga a sena go ja). Esau o ikanne maikano. O ne a sa gopole gore botsalwapele bo ne bo tlhokega. O ne a gopotse nako eo fela. Esau o ne a lebetse isago

(bo-kamoso). O reiksitse botsalwapele jwa gagwe ka dijo tsa nako e le nngwe-fela. O rekisitse ditshwanelo tsa gagwe jaaka tlhogo ya legae, ka pitsa ya dinawa.

Jakobe ga a ka a leta Modimo go tsewedisa thulaganyo ya One. Jakobe o gopotse gore o ne a tshwanetse go thusa Modimo ka boferefere. Jaanong o tlhokile tshegofatso ya ga Isake gape.

JAKOBE LE REBEKA BA TSIETSA ISAKE

Bala Genesisise 27. Kgaolo e e bolela kaga leano la ga Rebeka le Jakobe go tseela Jakobe tshegofatso ya ga Isake. Ba rulagantse go dira Jakobe go utlwala le go nka jaaka Esau. Rebeka o ne a bofelela boboa jwa dipodi mo letlalong la ga Jakobe le le borethe. A tlisetsa Jakobe diaparo tsa ga Esau go di apara. Isake o ne a tsofetse mme a le sefofu. O ne a nka monkgo wa ga Esau. O utlwile letlalo le le boboa. Mme o file Jakobe tshegofatso.

Esau o ne a galefa thata. O ne a tsieditswe ga bedi. Boswa jwa gagwe e ne e tla nna sephatlo sa boraro go lekana le jwa ga Jakobe. O ne a se kake a nna tlhogo ya ba-ntlo. O ne a gopotse fela nako ya jaanong mme o ne a lebetse nako ya botshelo jwa gagwe yotlhe. O ne a tla nna mo seemong (bonnong) sa bobedi. Jalo Esau a dira leano la gagwe la sebele. O ne a tla leta go fitlhelela Isake a swa, jalo o ne a tla bolaya Jakobe.

Rebeka o utlwile kaga leano la ga Esau. O itsile gore Jakobe o tlhokile go tlogela legae. Rebeka o ne a hutsafetse ka gonne Jakobe o ne a tsamaya. Isake o ne a ikaelela go buetsa Jakobe kwa morago kwa go ba-losika lwa ga Rebeka go batla mosadi. Jakobe a rulaganya go itira tlhogo ya legae. Jaanong o ne a tsamaya.

(Balela tlelase Genesisise 29:21-26.)

MOTSIETSI O A TSIEDIWA

Jakobe o ne a tsieditse ba bangwe. Jaanong o batlile sengwe. O batlile morwadie Malomaagwe, ebong Ragele, go nna mosadi wa gagwe. Mme Labane o batlile go latela mokgwa wa batho ba gagabo. Go ne go tlhokega mo mosetsaneng yo motona go nyalwa pele. Jalo Labane a tsietsa Jakobe.

Mo bosigong jwa lonyalo Labane o ne a dira modiro. Mongwe le mongwe a ja dijo tse dintsi. Ba ne ba itumetse mmogo (batho). Jalo monyadiwa o ne a tlisiwa kwa go Jakobe. O ne a apere diaparo tse dintle. Gongwe sefathlogo sa gagwe se ne se khurumeditswe ka losire. E ne e le bosigo mme Jakobe o ne a se kake a bona. A (Jakobe) tsena kwa mosading wa gagwe.

Moso wa tla. Mme jalo Jakobe a bona leano la ga Labane. O ne a nyetse mosetsana yo motona, ebong Lea! Jakobe o ne a galefile thata. O boditse Labane gore ke ka ntlha ya'ng a mo tsieditse! Mme Labane a mo solofetsa go mo naya Ragele gape. Jalo Jakobe a ithuta gore go ntse jang go nna le mongwe o sele go mo tsietsa. Jakobe o dirile dingwaga di le lesome le bone tse di telele go tsaya moratiwa wa gagwe, ebong Ragele.

Modimo O ne O baakanyetsa Jakobe tiragatso ya ditshofetso tsa kgolagano. Botshelo jwa ga Jakobe bo ne bo santse bo tletse boferefere le tsietso. O ne a ise a ithute go letla Modimo go dira dithulaganyo le go di fetisa. O ne a ise a ithute go ikobela Modimo.

DILO TSA GO DI GOPOLA

O motho wa mofuta ofe? A o dirisa tuelelo ya phaposo le tsietso go tlisa tswelelopele mo botshelong jwa gago? A o kile wa leka go botsa Modimo gore thulaganyo ya One kaga gago ke eng? Fa o e bona, o tshwanetse go ikanya Modimo go go tsweledisetsa thulaganyo ya One. Fa O go bolelela go dira sengwe, o tshwanetse wa bo o ipaakanyeditse go se dira. Modimo O tla go dira go kgona go latela thulaganyo ya One ya botshelo jwa gago. O tshwanetse go O ikanya. O tshwanetse go bala Baebele go itse gore ke mofuta ofe wa motho o Modimo O batlang Bakeresete go o nna. O tshwanetse go bua le Modimo mo thapelong. O tshwanetse go reetsa Modimo mo thapelong.

SE THUTO E E SE RE RUTANG

1. Boferefere le tsietso ga diyo gope mo thulaganyong ya Modimo ya mongwe le mongwe.
2. Boikemelo ga bo a siama ka metlha, mme go ikanya Modimo go siame ka metlha.
3. Ga re a tshwanela go direla Modimo tiro ya One gope. Modimo O kgona go dira tiro ya One. Modimo O batla re dira tiro e O nang le yone ya rona go e dira — ka go tlhoka maitiketso le ka boikanyego.

GO-KOPANA LE MODIMO GO TLISA PHETOGO

DIKWALO TSA GO ITHUTA KWA GAE:

Genesise 28:10-28; 32:1 - 33:4.

DIKWALO TSA THUTO YA GOMPIENO:

Genesise 28:10-17; 32:24-28.

TEMANA YA TLHOGO: *"Ke gone ikokobeletseng fa tlase ga letsogo le le nonofileng la Modimo, gore O tle O lo goletse mo lobakeng lo eleng lone."* (1 Petere 5:6).

Re setse re ithutile gore batho ba leofile mme ba sentse lefatshe le Modimo O ne O le tlhodile. Modimo O rulaganyeditse batho tsela ya go nna tshiamo le go nna le bokopano le One gape. Modimo O buile le Aberahame mme wa tlhophla Aberahame le ba-lelwapa la gagwe go nna karolo ya leano la Modimo. Modimo O file Aberahame Isake gore thulaganyo ya One e ka tsewelela. Mo thutong ya gompieno re tla ithuta jaaka Modimo O biditse Jakobe mme Wa dira ditsholofetso tsa kgolagano le Jakobe ka sebele.

(Balela tlelase Genesise 28:10-17.)

BOSIGO JWA NTLHA GO TSWA MO GAE

Jakobe o dule mo gae ka ntlha ya gore Esau o ne a ikanela go mmolaya. Gape Isake, rragwe (Jakobe), o batlile Jakobe go nna le mosadi yo o tswang mo bathong ba gagabo. Jalo Jakobe o dule mo gae go etela malomaagwe, ebong Labane. Jakobe o tsamaile a le nosi.

Bosigo jwa ntlha Jakobe o eme go robala fa fatshe. Ga re itse dikakanyo tsa ga Jakobe. Gongwe o ka ne a akantse bodiphatsa jwa go robala fa fatshe mo lefelong le o sa le itseng. Gongwe o ne a gakologelwa rragwe le mmagwe kwa gae. Gongwe o ne a ikutlwa bodutu fa a beile lentswe go nna mosamo wa gagwe mme a rapama go robala.

Go tswa mo gae e ne e le nako ya phetogo mo go Jakobe. O ne a tlaabo a ithuta dilo tse dintšha le go bona mafelo a mantšha. Modimo O tlhophile nako ya One go bua le Jakobe. Fa Jakobe a ne a tla tshegetsa ditsholofetso tsa ga Aberahame tsa kgolagano, o tlhokile go dira boineelo jwa gagwe jwa sebele go sa le gale mo botshelong jwa gagwe. Jakobe o ne a na le go le gontsi go go ithuta. O tlhokile go baya boikanyo jwa gagwe mo Modimong go na le mo bothaleng jwa gagwe.

O tlhokile go ithuta go letla Modimo go fetisa dithulaganyo tsa One go na le go dira boferefere le go tsietsa morwa-rragwe.

Modimo O buile le Jakobe mo torong. Jakobe o bone sepalamo se se tswang kwa legodimong se tsena mo lefatsheng. Mo go Jakobe se se reile gore go ne go na le tsela ya batho go goroga kwa Modimong. Baengele ba ne ba tlhatloga mme ba fologa ka sepalamo. Melaetsa e ne e ka tla kwa mothong e tswa kwa Modimong. Melaetsa e ne e ka ya kwa Modimong e tswa mo mothong. Modimo O ne O le kwa godimo-dimo ga sepalamo. O tsile o batla Jakobe. Gongwe e ne e le thuto ya ntlha Jakobe a ithutile kaga Modimo. Modimo ka Bo-One O ne O rulaganya botshelo jwa ga Jakobe, mme Modimo O ne O tla tlisa dithulaganyo tsa One mo tiragalong.

(Balela tlelase Genesis 28:20-22.)

MODIMO O NTŠHAFADITSE KGOLAGANO LE JAKOBE

Mo torong ya gagwe Jakobe o utlwile mafoko a kgolagano. Jehofa Modimo O solofeditse go fa Jakobe lefatshe le o robetseng mo go lone le losika lwa gagwe ka bosakhutleng. Dikokomana tsa ga Jakobe e ne e tla nna batho ba le bantsi. Batho botlhe ba lefatshe ba ne ba tla segofadiwa ka ntlha ya losika lwa ga Jakobe. Mme Modimo Wa solofetsa go babalela Jakobe le go mmusetša kwa lefatsheng le Modimo O ne O le mo solofetsa.

Fa Jakobe a tsogile, o ne a tletse tshisimogo le poifo. O ne a tshaba, gonne Modimo O ne O le teng mo lefelong leo. Jakobe o biditse lefelo leo Ntlo ya Modimo le kgoro ya Legodimo. O le biditse Bethel. Jakobe o ithutile gore Modimo e ne e se Modimo wa ga Aberahame le Isake fela. Jakobe o ithutile gore Modimo gape e ne e le Modimo wa ga Jakobe.

Mo pelong ya gagwe Jakobe o dirile karabo mo Modimong. O dirile ikano. Jakobe o kopile Modimo go dira dilo di le pedi. O kopile Modimo go tlamela letlhoko la gagwe la nama (mmele) jaaka dijo le diaparo. O kopile Modimo gape go mmusetša kwa ntlong ya ga rragwe ka kagiso. Jakobe o solofeditse go ipaya fa tlase ga taolo ya Modimo. Jehofa Modimo e ne e tla nna Modimo wa gagwe. Jakobe o solofeditse go busetsa sa bo-some sa dikhumo tsotlhe tse Modimo O ne O tla di mo naya. Modimo O ne O tla babalela Jakobe, mme Jakobe o ne a tla direla Modimo.

JAKOBE MO HARANA

Jakobe o ne a ya kwa Harana mme a nna le malomaagwe, ebong Labane. Jakobe o dirile dingwaga di le lesome le bone go duelela

bo-morwadie (Labane), Ragele le Lea. Re ithutile beke e e fetileng gore Labane o tseditse Jakobe mo letsatsing la lonyalo lwa gagwe. Genesis 30:25-43 o bolela jaaka Labane a kopile Jakobe go tswela jaaka modisa wa gagwe. Jalo Jakobe a nna dingwaga di le thataro gape mme a huma. Jehofa o ne a segofatsa Labane ka ntlha ya ga Jakobe. Modimo O ne Wa segofatsa Jakobe ka dikgomo le bana ba basimane.

JAKOBE O BOELA GAE

Nako e ne ya tla mo go Jakobe go boela gae. Jakobe o ne a phutha sengwe le sengwe go ya Kanana. O ne a tsaya basadi ba gagwe, bana batlhanka, dikgomo le diphologolo tse dingwe. Ba simolola mo mosepeleng wa bone. Mme Jakobe a simolola go gakologelwa nako ya fa a dule kwa gae. A gakologelwa batsadi ba gagwe. Jakobe o ne a sa itse gore a ba santse ba tshela kgotsa nnya. O tshwanetse a bo a gakologetswe jaaka a dule kwa gae a le nosi le dithoto di se-kae. O ne a boa e le mohumi le tsa-ntlo tse di tona. Modimo O ne O tshegeditse ditsholofetso tsa One mo go Jakobe. Jakobe o ne a babaletswe sentle thata, mme jaanong o ne a boela gae. Jakobe gape a simolola go gakologelwa bogale jwa ga Esau. Jakobe o ne a ise a itse gore a o boa mo kagisong gongwe nnyaa.

Jakobe o ne a roma barongwa go bolelela Esau gore o tla gae. Ba ne ba boa mme ba bolelela Jakobe gore Esau o tla go mo kgaatlhantsha le lesomo le legolo la batho. Jakobe o ne a tshaba. O rometse dineo kwa go Esau. O ne a kgaoganya ba-lelwapa la gagwe gore ba seka ba bolawa botlhe ka nako e le nngwe-fela.

Fa a ne a dirile gotlhe mo o ne a ka go dira go sireletsa lelwapa la gagwe, Jakobe o itsile gore go ne go sa lekana. O ne a seka a akanya boferefere le ditsietso. Jakobe o ne a ithutile gore Modimo O ne O na le nonofo ya go tshegetsa ditsholofetso tsa One. Jalo Jakobe a isa matshwenyego a gagwe kwa Modimong mo thapelong. Jakobe o ne a ikokobeditse fa pele ga Modimo. Bala thapelo ya ga Jakobe mo go Genesis 32:9-12 go bona gore Jakobe o ne a fetofile jang.

(Balela tlalase Genesis 32:24-28.)

JAKOBE O NNA LE LEINA LE LE NTŠHA

Jakobe gape o ne a atamela nako ya phetogo mo botshelong jwa gagwe. O ne a ithutile go ikaega ka Modimo. Bosigo joo o ntse le kopano e nngwe le Modimo.

Monna o tsile kwa go Jakobe mme ba sokasokana bosigo jotlhe. Monna o ne a se kake a fenywa Jakobe jalo a betsa noka ya ga Jakobe

mme a e ntsha mo lekololong. Mme Jakobe a nna a itshwarelela (ka monna). Jalo monna a kopa Jakobe go mo lesa gore a tsamaye. Jakobe a batla tshegofatso mo go ene mme a botsa leina la gagwe. Monna o ne a se ketla a bolela leina la gagwe, mme o ne a segofatsa Jakobe mme a mo naya leina le lentšha.

Bala Genesis 32:28 gape. Iseraele. Jakobe o ne a simolola karolo e ntšha ya botshelo jwa gagwe. O ne a simolola morafe o moša o o ne o tla bidiwa ka leina la gagwe. Mme tsotlhe tse Jakobe o di dirileng jaaka motho yo moša, Iseraele o ne a ka rulaganngwa le go tsamaisiwa ke Modimo ka sebele. Motsietsi, wa moikgodisi o ne a fetoletswe mo motlhankeng yo o boikobo wa Modimo. Ka Iseraele Modimo O ne O ka tswelela go dira leano la One go rekolola motho.

DILO TSA GO DI GOPOLA

Dinako tse dintsi re rulaganyetsa tswelelopele ya malwapa a rona. Re batla go nna le dijo tse dintsi le diaparo. Go aka le boferefere gase tsela ya go babalela malwapa a rona. Re tshwanetse go batla kopano le Modimo mme re ipaakanye go ipaya ka-fa-tlase ga ditaolo tsa One. Modimo O setse O re batla pele ga re simolola go O ikanya.

Esau gase motho yo mogolo mo polelong e. Mme o re beetse sekai se se siameng go se latela. Lefa Jakobe a ne a dirile phoso, Esau o mo itshwaretse mme a mo amogela ka lorato. Malwapa a le mantsi gompiano a tshwenyegile ka ntlha ya dipelo tse di sa itshwareleng le lefufa. Se ga se itumedise Modimo gotlhe-gotlhe. Re tshwanetse go supetsa mongwe le mongwe lorato, bogolo malwapa a rona.

Fa Jakobe a kopane mme a sokasokane le Modimo, e ne e le motho yo o fetogileng. O ne a bile a na le leina le lentšha. Fa re kopana le Jesu Keresete mme re mo amogela jaaka Morena wa rona, re tshwanetse go fetoga. Baagisani ba rona ba tshwanetse go kgona go bona ka ditiro tsa rona le mafoko gore re bana ba Modimo. Re supe lorato.

Maikaelelo a thuto e ke go re ruta gore go kopana le Modimo go tshwanetse go re fetola gore re batle thulaganyo ya Modimo mme re e latele mo nonofong ya One le lorato.

SE THUTO E E SE RE RUTANG

1. Fa re kopana le Modimo, re tla fetoga. Fa re dumela go dumela mo go One, re tla nna motho yo moša. Matshelo a rona a tla fetogela mo sengweng se se molemo. Fa re gana Modimo, matshelo a rona a tla bola thata le go nna bosula.

2. Modimo O batla go re thusa go re tseela thato ya One. Re tshwanetse go rata go dira go-rata ga One, fa re batla thuso ya One.
3. Modimo O beetse mongwe le mongwe wa rona mo lefatsheng maikaelelo.
4. A botshelo jwa gago bo farologane jaanong le jaaka bo ne bo ntse pele ga o ntse Mokeresete? Bo tshwanetse — fa o kopane le Modimo mme o O neetse pelo ya gago le botshelo jwa gago.

GO KGARATLHA LE BOIKGODISO LE LEFUFU

DIKWALO TSA GO ITHUTA KWA GAE: Genesis 37.

DIKWALO TSA THUTO YA GOMPIENO:

Genesis 37:5-11, 17-20, 23-34.

TEMANA YA TLHOGO: *"Lorato lo itshoka ka pelotelele, lo pelonomi; lorato ga lo pelotshetlha; lorato ga lo ko lo ikgantsha, ga lo mabela. Ga lo ko lo dira kafa go sa tshwanelang, ga lo ko lo ipatlela fela, ga lo ko lo gakatse, ga lo ko lo akanya bosula"*

(1 Bakorintha 13:4-5).

Mo mokgathong wa mofuta mongwe le mongwe fa batho ba tshwanetseng go dira mmogo, boikgodiso le lefufa di dira matshwenyego. Moeteledi-pele yo o tlhophilweng o ka nyatsa batho ba gagwe ka gonne ba sa mo supetse tlotlo. Mongwe yo o ne a solofetse go tlhophiwa, mme a seka a tlhophiwa, o nyatsa yo o tlhophilweng mme o leka go bontsha batho botlhe diphoso tsa yo o tlhophilweng. Ngwana wa mosimane o ka fufegela tlhokomelo e rragwe o e fang ngwana yo mongwe mo lwapeng. Mo maemong mangwe le mangwe a, lefufa le boikgodiso di tliša ntwā le kgaogano. Mme mo boemong bongwe le bongwe mokgatlho gongwe lelwapa le tliša nonofa thata mme le thusa mongwe le mongwe thata, fa batho botlhe ba dira mmogo. Re thusane. Modimo O rometse Jesu go re supetsa tsela ya lorato.

Polelo ya ga Josefe e re bontsha gore lefufa le boikgodiso di ka nna maswe jang.

(Balela tlelase Genesis 37:1-4.)

GO-PALELWA GA GA JAKOBE GO RUTA BANA BA GAGWE

Jakobe, yo jaanong o bidiwang Iseraele, o goletse mo legaeng le le tletseng boikgodiso le lefufa. Ga a a ithuta mo batsading ba gagwe gore o ka dira eng kaga lefufa. Jalo fa a ntse rre o supile phatlalatsa gore o ratile ngwana wa mosimane a le esi go feta ba bangwe. Ragele e ne e le mosadi wa gagwe yo o mo ratang thata. O ratile ngwana wa mosimane wa ga Ragele go feta ba bangwe. O mo file kobo e e tlhotlha e kgolo ya mebala e mentsi. Bana ba basimane ba ga Jakobe ba ne ba simolola go ila Josefe.

Iseraele ga a a itse go ruta bana ba gagwe ba basimane kaga lefufa. Josefe o dirile dilo di le dintsi tse di dirileng bo-morwarragwe go mo ila le

eleng mo go fetileng. Fa ba dirile sengwe se se phoso, Josefe o boletse Iseraele kaga sone. Josefe o itsile gore e ne e le moratiwa, mme o supile boikgodise jwa gagwe ka ditsela di le dintsi.

(Balela tlelase Genesis 37:5-11.)

TORO YA GA JOSEFE

Bosigo bongwe Josefe o lorile toro e e gakgamatsang. Batho ba malatsi a ga Josefe (ba bogologolo) ba ne ba dumela gore ditoro di ne di tlhokega mme di na le thanolo. Le eleng jaaka lekawana, Josefe o bone ditoro di tlhokega mo botshelong jwa gagwe. Ga a a itse gore nonofo ya gagwe ya go tihaloganya ditoro le go di phutholola, letsatsi lengwe e tla dirisiwa ke Modimo go boloka ba lelwapa la gagwe. Ga a a lemoga gore o ne a filwe neo ke Modimo. Josefe o ne a sa bone gore o ne a filwe neo ke Modimo. Josefe o ne a sa bone gore o na le boikarabelo jwa go dirisa neo eo ka botlhale.

Josefe o boletse bo-mogoloe toro e e gakgamatsang e. Ba ne ba tiwaetse boikgodiso jwa ga Josefe. Fa Josefe a ba boletse gore dingata tsa bone tsa mabele di obame fa pele ga ya gagwe, ba ne ba galefa thata. Kafa mekgweng yotlhe ya batho ba bone, Josefe jaaka ngwana wa mosimane ya mmotlana o ne a se kake a kgona go laola bo mogoloe ba basimane.

Ba boditse gore, “A ka boammaaruri o tla re laola? Gongwe a ka boammaaruri o na le puso mo godimo ga rona?”

Josefe a lora gape. Mo go Genesis 37:9 bala gape kago toro ya ga Josefe ya bobedi. Mo torong e, letsatsi le kgwedi le dinaledi di le lesome le motso di obametse Josefe. Lelwapa lotlhe le phutholotse toro go thalosa gore mmagwe Josefe le rragwe ba ne ba mo ikobela mmogo le bo-mogoloe.

Lefufa la bo-mogoloe Josefe la gola, la gola. Iseraele, lefa go ntse jalo o ne a na le ditoro tse eleng tsa gagwe. O ne a boloka tse mo tlhogong mme a di gakgamalela. O itsile gore gantsi Modimo O romela melaetsa ka ditoro. Mme o ne a omanyetsa Josefe tsela e o boletseng toro ka yone.

(Balela tlelase Genesis 37:17-20.)

BONANG MOLORI O ETLA

Iseraele o ne a na le matsomane a matona a diphologolo. Bana ba basimane ba batona ba gagwe ba ne ba tlhokomela matsomane, ka metlha le metlha ba fuduga mo lefelong lengwe ba ya kwa go le lengwe go batla bojang le metsi. Ba ne ba dule mo gae nako e telele. Iseraele o

batlile go utlwa dikgang tsa bone le go itse gore ba ne ba bolokesegile. Jalo a romela Josefe go ya go ba bona le go mo tlišetsa lefoko gape.

Josefe o ne a tsamaya fa morago ga bo-mogoloe. O ne a ba latela go fitlhelela a tla kwa Dothana. Bo-mogoloe ba ne ba mmona a le kgakala. Kilo le lefufa la bone la ba dira go dira bosula. Ba rulaganya go mmolaya. Ba rulaganya go tšietsa rrabone. Ba rulaganya go bolelela Iseraele gore Josefe o balailwe ke phologolo ya naga.

(Balela tlelase Genesis 37:21-24.)

RUBENE O BOLOKA BOTSHELO JWA GA JOSEFE

Rubene e ne e le mogoloe-bone yo motona. O ne a tla tsaya gabedi ga kabelo ya boswa jwa ga Iseraele. O ne a tla nna tlhogo ya lelwapa e e latelang mme a amogele tšhegofatso ya ga Iseraele. Le eleng jaanong, o ne a tla nna le boikarabelo mo go Iseraele ka ditiro tsa bo-monnawe.

Rubene o ne a kopa bo-monnawe go se bolaye Josefe. O ne a tlhagisa gore ba mo lathele mo khuting. Rubene o ne a rulagantse go boa morago go falodisa Josefe. Jalo o ne a ka busetsa Josefe kwa go rragwe, ebong, Iseraele.

(Balela tlelase Genesis 37:25-28.)

JOSEFE O REKISITSWE

Bo-mogoloe Josefe ba mo tsentse mo khuting e e boteng. Ba tshotse kobo ya ga Josefe e ntle. Rubene o ne a seyo mo setlhopheng fa ba ntse fa fatshe ba a ja mmogo.

Gone fela ka nako eo lesomo la babapatsi la atamela (Genesis 37:25-28). Juda, mongwe wa bo-mogoloe, a tlhagisa gore ba rekise Josefe boemong jwa go mmolaya. Jalo, ka madi, banna ba rekisa monnabone. Josefe o ne a isiwa kgakala kwa Egepeto.

Morago, Rubene a boela kwa setlhopheng. O ne a leba mo khuting. Josefe o ne a tsamaila! Ka tlalelo, Rubene a gagola kobo ya gagwe mme a senolela bo morwarragwe gore o ne a ikaletse go boa le go boloka Josefe. Mme Josefe o ne a ile. Go ne go sena tsela ya go mmusa. Jalo bo-mogoloe ba bolaya podi mme ba ina kobo ya ga Josefe mo mading a yone. Mme ba e isa kwa go rrabo.

Ba boleletse Iseraele gore “Re setse se; bona jaanong gore a ke kobo ya ga morwao gongwe nnya.”

“Mme a e itse, mme o rile, Ke kobo ya ga morwaake; sebatana sa naga se mo jele; Josefe kwa-ntle ga pelaelo o gagogantswe!” (Genesis 37:33).

Jalo Iseraele a ikgagola diaparo mme a apara letsela la kgetsi. Kwa-ntle ga pelaelo bo-morwawe ba ne ba hutsafalela se ba se dirileng.

Ba lekile go gomotsa rrabo. Mme o ne a gana go gomodiwa mme a tswelela go lelela Josefe.

Bala Genesis 37:36.

Josefe o ne a ya Egepeto. O ne a sa tshole a le morwa yo o boikgodiso yo o ratiwang ke rragwe. E ne e le lekgora. Josefe o ne a na le nako e ntsi go akanya kaga se se mo diragaletseng. O ne a na le nako go hutsafalela boikgodiso jwa gagwe. O gakologetswe ditoro tsa gagwe. O gakologetswe gotlhe mo o ne a go rutilwe kaga Modimo. Gongwe o simolotse go baya tumelo ya gagwe mo Modimong go mmabalela le go rulaganyetsa botshelo jwa gagwe. Josefe o ne a gola mo tumelong. Mme a gola mo boikokobetsong.

DILLO TSA GO DI GOPOLA

Mo polelong e ke mang yo o utlwisitsweng-botlhoko ke boikgodiso le lefufa? Josefe o ne a utlwile-botlhoko. Ka go supa boikgodiso jwa gagwe, o dirile kilo le lefufa go gola mo dipelong tsa bo-morwa rragwe. Jalo o ne a rekisiwa kgakala go tswa mo lwapeng le o ne a ratega mo go lone.

Iseraele o ne a utlwile-botlhoko. Ka go supa kgobelelo, Iseraele o thusitse go dira kilo fa gare ga bo-morwawe. Fa a latlhegetswe ke Josefe pelo ya gagwe e ne e thubilwe ke khutsafalo.

Bo-mogoloe Josefe ba ne ba utlwile-botlhoko. Morago ga ba letlile lefufa go goleta mo kilong, ba rekisitse Josefe. Nako yotlhe fa ba lebile khutsafalo ya rrabo yo o godileng ba ne ba tshwanetse go utlwa gape molato wa bone. Ba ne ba se kake ba kopa boitshwarelo mme ba nna le kagiso gape mo dipelong tsa bone kwa-ntle ga go ikotlhaya mo go Iseraele kaga se ba se dirileng.

A o kile wa fufegela mongwe yo e ne e le moeteledi-pele mo legaeng la gago, mo motseng, mo phuthegong (kerekeng)? A o lefufa fa Modimo O dirisa motho yo mongwe, go bakelwa go dira sengwe se se siameng? A o lefufa fa mongwe a amogela neo mme o sa e amogele? A o ikgantsha kaga go nna moeteledi-pele mme o batla tlotlo mo go ba bangwe. Boikgodiso jo le lefufa di go utlwisile-botlhoko. Bo ka tlisa sebe mo botshelong jwa gago. Ke Modimo fela O O ka ntshang dikgopolo tsa sebe mme Wa tsenya dikgopolo tsa lorato mo boemong jwa tsone. Re tshwanetse go rapela le go kopa Modimo go re thusa go supa lorato mo matshelong a rona.

SE THUTO E E SE RE RUTANG

1. Fa Modimo O bopile motho, O bopile mongwe le mongwe a le pharologanyo. Ga go bape ba rona ba ba tshwanang tota. Modimo O file mongwe le mongwe wa rona dinonofo tse di farologaneng. Ga re kake ra dira dilo tse di tshwanang rotlhe.
2. Modimo O tlhoka Mokeresete mongwe le mongwe ka bo-ene go O direla kafa nonofong e Modimo O mo e fileng.
3. Re seka ra fufegela ba bangwe ba ba dirisetsang Modimo dinonofo tsa bone.
4. Lefufa le kilo di dira kutlobotlhoko le kgaogano. Lefufa le kilo ke didirisiwa tsa ga Satane. Re tshwanetse go ikanya Modimo le go ikaega ka Modimo go re thusa go fenyha dilo tse mo matshelong a rona.
5. Lorato ke karabo ya Modimo mo mathateng a rona a mantsi gompieno.
6. Boitshwarelo bo tlhokega gotlhelele, go tshwanetse go nna le kagiso le kopano fa gare ga bakaulengwe.

GO BONA NONOFO MO GO DIRELENG MODIMO

DIKWALO TSA GO ITHUTA KWA GAE: Genesis 39.

DIKWALO TSA THUTO YA GOMPIENO:

Genesis 39:6-12, 16-17, 19-21.

TEMANA YA TLHOGO: *"Ga lo a welwa ke thaelo epe e e sa kakeng ya itshokelwa ke motho: Mme Modimo O boikanyo o o se ketlang o lo lesa lwa raelwa ka mo go fetang nonofo ya lona; mme o tla re mo thaelong o lo baakanyetse kgoro ka phalolo le yone, gore lo tle lo bone go e itshokela"* (1 Bakorintha 10:13).

Motho mongwe le mongwe o raelesaga go leofa gantsi mo botshelong jwa gagwe. A o gakologelwa nako e o raelesegileng go dira sengwe se se phoso? Ga a leofe fa ese a intsha gongwe a ineela mo thaelong mme ka sebele a dira sebe. Fa Mokeresete a bala Lefoko la Modimo mme a rapela gantsi, o ka itse se Modimo O mmatlang go se dira. O ka nna le nonofo ya Modimo ya go lwantsha sebe. Ga re na nonofo jaaka batho go fenywa thaelo ya go leofa. Modimo O na le nonofo. Jesu o sule go re dira gore nonofo eo e bonale mo go rona.

Gompieno re tla ithuta kaga Josefe morago ga a sena go rekisiwa jaaka lekgoba mo lesomong la babapatsi. Re tla ithuta jaaka a lole kgaatlhanong le sebe. Potifere, motlhabani, o rekile Josefe mo lesomong la babapatsi mme morago a dira Josefe molebalebi wa ntlo ya gagwe. Jaanong bala Dikwalo.

(Balela tlelase Genesis 39:1-5.)

MODIMO O SEGOFATSA LEKGOBA, JOSEFE

Modimo O ne O na le Josefe mo nilong ya ga Potifere. Josefe o diretse mong-wa-gwe tiro e ntle. Sengwe le sengwe se Josefe o se dirileng se ne sa atlega. Ba ntse le thobo e e siameng ya dijalo, le matlhape a diruiwa a ata. Ditemana tsa 2 le 3 tsa re, *"a bona fa Jehofa a na nae."* Tswelelo pele ya ga Josefe e ne e tswa kwa Modimong. Potifere o lemogile gore katlego ya gagwe e ne e le ka ntlha ya masego a ga Josefe a tswang kwa Modimong.

Se se supa phetogo e e gakgamatsang mo go Josefe. Mo thutong ya beke e e fetileng boikgodiso jwa ga Josefe bo dirile bo-mogoloe go mo ila. Polelo e e supa gore Josefe o file Modimo tlotlo ka ntlha ya tswelelo ya gagwe. Potifere o ne a sa obamele Modimo Wa ga Josefe, mme o

lemogile gore go ne go na le nonofo e kgolo kwa tirong mo botshelong jwa ga Josefe. Potifere o dumetse mo Modimong wa ga Josefe, ka ntlha ya tshupo ya ga Josefe kaga One, le ka ntlha ya jaaka Josefe a ne a tshela letsatsi le letsatsi. Potifere o ne a tsholetsa Josefe mo maemong, go fitlhelela a le kwa godimo ga ntlo yotlhe le sengwe le sengwe se Potifere o ne a na le sone, fa ese dijo tse di ne di jewa ke Potifere. Baegepeto ba ne ba na le mekgwa e e farologaneng ka dijo, jalo Josefe o ne a sa baakanye dijo tsa ga Potifere.

(Balela tlelase Genesise 39:6-12.)

MOSADI WA GA POTIFERE O RAETSE JOSEFE

Josefe e ne e le motho yo montle. O ne a le moša mme a nonofile. E ne e le morwa mohumi lefa a ne a le lekgoba. O ne a kgatlhisa mo matlhong.

Potifere e ne e le molaodi, wa balebeledi, modiredi wa ga Farwe. Gantsi o ne a tsamaila go tswa mo gae a le mo tirong ya ntwa ya ga Farwe. Mosadi wa gagwe o ne a sala kwa gae a le nosi. A simolola “go latlhela matlho a gagwe mo go Josefe” fa a ntse a dira tiro ya gagwe (Josefe). Mme, lwa bofelo, a mo laleletsa go lala le ene. Josefe o ne a sena mosadi. E tshwanetse ya bo e ne e le thaelo mo go ene go itumedisa letlhoko la mmele wa gagwe.

Mme Josefe e ne e le modumedi le molatedi wa ga Jehofa Modimo. O ne a rutilwe go tswa mo bongwaneng jwa gagwe go latela melao ya Modimo go tshela. Se se reile gore o tshwanetse go lala le mosadi fela, yo o tla nnang le ene letsatsi lengwe.

Josefe o boletse mosadi wa ga Potifere gore “Nnyaa.” O mo file dintlha tsa gagwe. O ne a sa batle go oka (siamolola) boikanyego jo mong-wa-gwe o bo beileng mo go ene. E ne e le mosadi wa monna yo mongwe. Mme lwa bofelo, Josefe o mmoleletse gore o tlaabo a leofa kgatlhanong le Modimo wa gagwe fa a ka amogela taletso ya gagwe. Mo go Josefe, boikobo jwa gagwe (Josefe) mo Modimong bo ne bo tlhokega go feta sengwe le sengwe. Mme o (mosadi) ne a se kake a amogela karabo ya ga Josefe mme a leka gape, gape.

Lwa bofelo, letsatsi lengwe Josefe a tsena mo ntlong ya ga Potifere go dira tiro ya gagwe. Mosadi wa ga Potifere a bona gore batlhanka ba bangwe ba ne ba seyo. Gongwe go sena ope yo o bonang, Josefe o ka dumela kopo ya gagwe. Jalo a tshwara Josefe jaaka a feta (fa go ene). Josefe o ne a tshaba. A ikgopola mo mosading mme a siela kwa-ntle ga ntlo. A tlogela kobo ya gagwe (Josefe) mo seatleng sa mosadi (wa ga Potifere). Kgopolo ya gagwe fela e ne e le go tswa fa mosading wa ga Potifere.

MOSADI WA GA POTIFERE O AKA KAGA JOSEFE

Mosadi wa ga Potifere yo o bodutu o ne a sa dumele mo Modimong. O ne a sena ditaolo tsa go tshela ka tsone. Ditebo tsa ga Josefe di ne di mo itumedisa thata thata, mme o batlile Josefe go itumedisa keletso e o (mosadi) e utlwileng mo mmeleng wa gagwe. E ne e le mosadi wa monna yo o humileng. O ne a ka nna le sengwe le sengwe se o se batlileng. Mme o ne a se kake a nna le Josefe. Keletso ya gagwe ya fetogela mo bogaleng le mo kilong. Jalo a ikaelela go utlwiswa Josefe botlhoko ka gonne a mo ganne.

Mosadi a tshegetsa seaparo sa ga Josefe. A bitsa batlhanka ba bangwe mme a ba bolelela gore Josefe o ne a lekile go lala le ene. O ba boleletse gore Josefe o ne a sia fa a simolotse go goa. Jalo a baya kobo ya ga Josefe go fitlhelela Potifere ka sebele a tla gae. Jalo a mmolelela maaka a a tshwanang kaga Josefe.

Potifere o ne a galefa thata. Ga a a botsa dipotso dipe kaga Josefe. O ne a dumela mosadi wa gagwe fela. A lebala gore Josefe o ntse a le boikanyo jang. A lebala jaaka Modimo O segofaditse ntlo ya gagwe ka ntlha ya ga Josefe. Mo bogaleng jwa gagwe o ne a dira gore go romelwe Josefe kwa kgolegelong ya ga Farwe. Gongwe morago Potifere le mosadi wa gagwe boo-babedi ba hutsafaletse ditiro tsa bone fa ba lemogile gore Josefe o tsamaile le molemo wa ga Jehofa. O (molemo) o dule mo ntlong ya ga Potifere ka ntlha ya maaka, le ka ntlha ya gore mosadi wa ga Potifere o ne a sena nonofo e e tswang kwa Modimong go lwantsha thaelo.

(Balela tlelase Genesis 39:19-23.)

JOSEFE MO KGOLEGELONG

Modimo O ne Wa seka wa lebala Josefe. Ga re itse gore Josefe o akantse kaga eng mo malatsing a gagwe a ntlha mo kgolegelong. Gongwe o ka ne a a akantse kaga tshiamololo e o bogileng. O ne a otlhaelwa go dira tshiamo! Mme ka bonako o lemogile gore Modimo O ne O santse o mmabalela. Le eleng mo kgolegelong Modimo O mo supeditse lorato lwa One lo lo tlhomameng.

Motlhokomedi wa kgolegelo o ne a rata Josefe. Modimo O file Josefe thekegelo mo go bao ba ne ba na nae. Ka bonako o ne a bewa kwa godimo ga magolegwa a mangwe otlhe. Bontsi jwa batho ba, ba ne ba le koo ka ntlha ya go se itumedise Farwe. Maemo a bone a pele a ne a le mo lefelong la ga Farwe. Jalo Josefe o ne a tla go itsiwe mo bathong ba ba ne ba thusitse go laola lefatshe la gagwe la Egepeto. Josefe ga a ise a ke a lebale gore phenyo ya gagwe yotlhe e dule mo Modimong. O santse a lekile go direla Modimo, le eleng mo kgolegelong.

DILO TSA GO DI GOPOLA

Go na le dithaelo di le dintsi tse di ka tlang mo go rona jaaka Bakeresete. Re raelesega gore re tshwarege thata gore re seka ra nna le nako ya go ja dijo tsa moya jaaka palo ya Baebele le thapelo. Re raelesega go tlhokomela merero ya ditiro mo mosong wa Tshipi go na le gore re ye phuthegong (kerekeng). Re raelesega go utswa tsa bosome, karola ya madi a rona a Morena, go tlhokomela sengwe se re se tlhokang. Re raelesega go duela tuelo ya phaposo go bona sengwe se re se tlhokang. Re raelesega go itumedisa letlhoko la rona la mmele ka ditsela tse di sa itumediseng Modimo.

Mo go tsa ditsela tse tsotlhe le tse dingwe tse dintsi, Satane o leka go re raela go nna kafa tlase ga taolo ya gagwe boemong jwa taolo ya Modimo. Gantsi re tlhopha go sala tsela ya ga Satane morago, e e motlhofo. Re fosa kgakgamatso ya go bona Modimo O babalela letlhoko la rona. Re fosa kitso e e gagamatsa e Modimo O rulaganyang matshelo a rona le go re babalela ka yone. Re fosa masego a Modimo O batlang go a re fa. Sebe se tla fa gare ga rona le Modimo, mme ka metlha re ba ba sa gagamalang (re a palelwa).

SE THUTO E E SE RE RUTANG

1. Motho mongwe le mongwe o raelesega go leofa. Mme rona badumedi re na le thuso ya Modimo go fenyha thaelo.
2. Modimo ga O ketla O letla Satane go raela modumedi go feta nonofo ya gagwe. (Bala 1 Bakorintha 10:13.)
3. Fa re fenyha dithaelo, re nonofa segolo mo tumelong ya rona. Re nna batlhanka ba ba botoka ba Modimo.

GO BAYA BA BANGWE PELE GA GO IPAYA

DIKWALO TSA GO ITHUTA KWA GAE: Genesise 43 - 44.

DIKWALO TSA THUTO YA GOMPIENO: Genesise 44:18-23,30-34.

TEMANA YA TLHOGO: *"Lo sa dire sepe ka go re lo itira lekoko, lefa e le ka go ipelafatsa fela, fa e se gore ka boikokobetso jwa pelo, mongwe le mongwe a kaye yo mongwe fa a mo gaisa ka molemo"*
(Bafilipi 2:3).

Jaaka motho yo moša, Josefe, go ikgopotse ene fela. O ne a tletse boikgodiso. O boleletse rragwe kaga diphoso tse bo-mogoloe ba di dirileng. Josefe o ne a ilwa. Bo-mogoloe ba mo rekisitse go nna lekgoba mo Egepeto. Jaaka batho ba baša, le rona re ne re tletse boikgodiso. Bangwe ba rona ga ba ise ba ke ba fenyse sebe sa boikgodiso, mme re ka se feny.

Pele Josefe e ne e le lekgoba mo ntleng ya ga Potifere. Modimo O ne Wa tshagofatsa Josefe le Potifere. Josefe o ne a ithutile go ikanya Modimo. O ne a ikaeletse go tshela ka melao ya Modimo. Fa mosadi wa ga Potifere a laleditse Josefe go lala le ene, Josefe o ganne. Fa go ne go ntse go ikgopotse, ene fela, le letlhoko la mmele wa gagwe, gongwe o kabo a ne a dumetse. Boemong jwa seo, Josefe o ikobetse Modimo mme a romelwa kwa kgolegelong.

Le eleng mo kgolegelong, Modimo O segofaditse Josefe. Ka bonako o ne a bewa kwa godimo ga magolegwa a mangwe otlhe. Fa o bala Genesise 40, 41 le 42, o tla ithuta polelo e e itumedisang ya jaaka Modimo O golotse Josefe mo kgolegelong mme wa mo naya tiro e ntšha go e dira — go laola Egepeto.

(Balela tlelase Genesise 41:1,8-15.)

NEO YA GA JOSEFE

Fa Josefe a le mo kgolegelong o ne a phuthololela motshola-phahana wa ga Farwe toro. Motshola-phahana o ne a tswa mo kgolegelong mme a boela kwa morago go ya go dira mo ntleng ya ga Farwe. Se e ne e le se se tlhalositsweng ke toro. Mme motshola-phahana a lebala kaga Josefe.

Mme letsatsi lengwe Farwe a nna le toro. O ne a tshwenyegile thata. O ne a bitsa banna ba gagwe ba ba bōtlhale gore ba mmolelele tlhaloso ya toro ya gagwe. Mme ba ne ba sa kgone go phutholola toro. Mme motshola-phahana yo mogolo a gakologelwa Josefe. A gakologelwa neo

ya ga Josefe ya go phutholola ditoro. Jalo a bolelela Farwe gore gongwe Josefe o ka kgona go mo thusa.

Farwe a romela gore go bidiwe Josefe go tla. A mmolelela toro ya gagwe. Josefe o boleletse Farwe gore Modimo O o O direlang O tla fa Josefe tlhaloso ya toro. Modimo O supeditse Josefe gore toro ya ga Farwe e ne e raya gore go ne go tla nna le dingwaga di supa tsa dithobo mo Egepeto. Mme go ne go tla nna le dingwaga di supa tsa leuba. Josefe o boleletse Farwe gore o tlhokile go tlhopha mongwe yo o botlhale go boloka mabele mo dingwageng tse di siameng. Mme Egepeto o tla nna le mabele a a lekaneng dingwaga tse di maswe jalo batho ga ba ketla ba bolawa ke tlala.

(Balela tlelase Genesis 41:33-41.)

JOSEFE O DIRIWA MOLAODI

Farwe o ne a reetsa Josefe. Jalo a tlhopha Josefe go nna tlhogo ya tiro e e tlhokegane e. O ne a fa Josefe mosadi. Modimo O dirisitse neo ya ga Josefe go mo dira go kgona go laola Egepeto. Josefe e ne e le ene fela wa bobedi mo go Farwe. O ne a tsamaya mo Egepeto yotlhe. Mme jalo difalana (dipolokelo tsa mabele) di ne tsa tlala. Dingwaga di supa tse di siameng tsa tla kwa bofelong, mme dingwaga di supa tsa leuba tsa simologa.

(Balela tlelase Genesis 42:1-5.)

JOSEFE O KOPANA LE BO-MOGOLOE

Kwa morago kwa Kanana, Iseraele o utlwile kaga mabele kwa Egepeto. O rometse bo-morwawe go reka mabele. Mme morwawe yo mmotlana, Benjamine, o setse kwa gae. E ne e le ngwana wa mosimane yo o rategang mo go Iseraele, morwa wa bobedi wa ga Ragele, yo o (Ragele) o tlhokafetseng a mo tshola. Botsalo jwa ga Benjamine bo ne bo gomoditse Iseraele mo tatlhegelong ya ga Josefe. Benjamine e ne e le boipelo mo botsofeng jwa gagwe.

Bo-mogoloe Josefe ba ne ba tla kwa Egepeto. Ba obame fa pele ga Josefe. Fa Josefe a lemogile gore e ne e le bo-mang, gongwe o ne a gakologetswa toro e o ne a nna nayo fa a le mosimane. Josefe o ne a lebeja jaaka Moegepeto. Bo-mogoloe ba ne ba sa mo itse. Josefe o batlile go bona gore bo-mogoloe ke batho ba mofuta ofe. Jalo a seka a ba bolelela gore ke mang. O batlile go leka bo-mogoloe.

Josefe o rekiseditse bo-mogoloe mabele. Mme a ba bolelela gore ba seka ba tla go reka mabele gape, fa ese ba tlisitse le monnabone wa mosimane. Se se tlaabo se supa gore polelo ya bone e ne e le

boammaaruri le gore e ne e se ditlhola. Jalo banna ba boela gae le mabele a bone.

(Balela tlelase Genesis 44:1-5.)

BO-MOGOLOE (JOSEFE) BA A LEKWA

Letsatsi lengwe dikgetsi tsa mabele di ne di sena sepe gape. Iseraele o boleletse bo-morwawe go tsamaya gape go reka mabele. O ne a sa batle Benjamin go tsamaya. Lwa-bofelo, Juda, ngwana wa mosimane wa bobedi, o dirile tsholofetso mo go rragwe. O boleletse Iseraele gore o tlaabo a eletsa go ntsha botshelo jwa gagwe jaaka moemedi gore Benjamin o tla busediwa kwa go rragwe.

Jalo bo-mogoloe ba tla gape kwa Egepeto. Josefe a rulaganyetsa senwelo sa gagwe go tsenngwa mo kgetsing ya ga Benjamin. Mme o lopile gore Benjamin a sale jaaka setshwarwa sa gagwe.

(Balela tlelase Genesis 44:18-23, 30-34.)

JUDA O BAYA BA BANGWE PELE

Juda o ne a hutsafetsa thata kaga se se ne se diregile. O gakologetswe lorato lo Iseraele o ne a na le lone mo go Benjamin. Gongwe o gakologetswe gore Iseraele o ne a hutsafaletse tatlhego ya ga Josefe jang. Mme a simolola go kopa fa pele ga ga Josefe.

Josefe o ne a reetsa Juda. O utlwile kopu ya ga Juda ya go tsaya boemo jwa ga Benjamin. Josefe o ne a ka bona gore Juda o ne a eletsa Benjamin le eleng go nna wa pele mo loratong lwa ga rragwe. Juda o ne a eletsa go nna motlhanka ka bo-ene go boloka rragwe yo o tsofetseng mo go thubeng ga pelo le tshotlego. Josefe o ne a simolola go lela ka tidimalo, mme a ba bolelela gore e ne e le mang.

Josefe o rometse gore rragwe a tle le go tlisa losika lotlhe kwa Egepeto. Bokgoba jwa ga Josefe le ditoro di ne di dirisitswe ke Modimo. Leano la One la go boloka motho le ne le sireleditswe. Batho ba Kgolagano ya Modimo ba ne ba bolokwa mo leubeng. Letsatsi lengwe batho ba Iseraele ba tlaabo ba boela kwa Kanana. Jalo Josefe a dira bo-mogoloe go solofetsa go busetsa kesi (setoto) ya gagwe kwa Kanana, fa Modimo lwa bofelo O ba gogetse kwa morago kwa lefatsheng le O le solofeditseng Aberahame, mogologolo wa bone.

DILO TSA GO DI GOPOLA

Juda o fetogile mo dingwageng. Pele o ne a fufegela Josefe mme a eletsa le eleng go mo rekisa jaaka lekgoba. E ne e le Rubene yo o lekileng go boloka Josefe, mo thutong ya beke e e fetileng. Mo polelong e Juda o

ntse moeteledi-pele wa bo-morwa-rragwe, lefa e ne e le ngwana wa mosimane wa bobedi. O ne a ithutifē go tlhakanela lorato lwa ga rragwe le barwa-rragwe. O ne a amega thata ka kagiso ya ga Iseraele go feta ya gagwe. O tshegeditse tsholofetso ya gagwe mo go rragwe lefa a ne a ka nna lekgoba. Lorato lwa gagwe lo mo dirile go aba botshelo jwa gagwe go boloka Iseraele le Benjamine. Juda o ne a ithutile go ikgopola jaaka motlhanka wa Modimo le go O ikobela. Le rona re tshwanetse go ithuta go tlhakanela lorato lwa Modimo le ba bangwe. Re emele se se siameng ka metlha.

SE THUTO E E SE RE RUTANG

1. Fa re rata mongwe ka boammaaruri, re tla ba gopola pele, mme rona lwa-bobedi.
2. Fa re rata Jesu ka boammaaruri, jalo re tla batla ba bangwe go Mo itse le lorato lwa Gagwe. Re tla tlhakanela Jesu le ba bangwe ba ba re dikologileng.
3. Fa re rata Jesu ka boammaaruri, matshelo a rona a tla go supa. Ka go supa lorato le kamego mo go ba bangwe; ka go tlhamalala ga rona, ka go nna boikanyego ga rona, batho mo tikologong ya rona ba tla itse gore re ba Modimo.
4. Re tshwanetse go tshela letsatsi le letsatsi gore re supetse ba bangwe tsela ya go itse Jesu le go tshela le Ene.

GO LETLANA

DIKWALO TSA GO ITHUTA KWA GAE: Genesis 45; 50:14-26.

DIKWALO TSA THUTO YA GOMPIENO:

Genesis 45:4-8, 15; 50:15-21.

TEMANA YA TLHOGO: *"Mme ke gone, fa o isa neo ya gago o le fa sebesong, mme o gakologelwa gona, fa wa gaeno a na le sengwe nao, tlogela neo ya gago fa pele ga sebeso, mme o ye o letlane le wa gaeno pele, mme fong o itse go tla o isa neo ya gago"* (Mathaio 5:23-24).

Beke e e fetileng re utlwile kaga jaaka Josefe a kopane gape le bagagabo. Re ithutile jaaka Juda a ne a fetogile. O kopile Josefe go mo letla go tsaya boemo jwa ga Benjamine jaaka lekgoba. Juda o ratile rragwe. O ne a sa rate rragwe go nna le bolwetsi jwa pelo ka go latlhegelwa ke morwawe yo mmotlana. Juda o ne a letla lorato go etelela tiro ya gagwe pele.

Josefe o bone phetogo mo go morwa-rragwe. A simolola go lela. O leletse kwa godimo thata mo batho mo ntlong ya ga Farwe ba ne ba ka utlwa. Mme o boleletse bo-mogoloe gore e ne e le mang. O ne a ba tlamparela mme a ba atla, mme ba bua mmogo.

(Balela tlelase Genesis 45:4-8, 15.)

JOSEFE O SENOLA SESUPO SA GAGWE

Bo-mogoloe Josefe ba ne ba gakgamaditswe gotlhe-gotlhe ke mafoko a ba a utlwileng. Molaodi wa bobedi wa Egepeto yotlhe o ne a re e ne e le morwa-rrabone, Josefe! Ba ne ba tla diragalelwa ke eng? Ba ne ba boifa thata lefa Josefe a lekile go ba tlhomamisetsa.

Josefe o boleletse bo-mogoloe gore ba seka ba omana gongwe go tshaba. O ba tlhaloseditse gore sengwe le sengwe se ne se dirisitswe ke Modimo go tlisa molemo. O tlhalositse gore leuba le ne le sa feta mme Josefe o ne a rometswe kwa Egepeto go dirwa molaodi gore a boloke matshelo a bone.

(Balela tlelase Genesis 47:5-6.)

ISERAELE O FUDUGELA KWA EGEPETO

Farwe o ne a utlwa gore ba lelwapa la ga Josefe ba ne ba tsile. O ne a fa Josefe tetelelo go dirisa dikoloi tsa segosi tsa Egepeto goya go tlisa Iseraele le losika lotlhe kwa Egepeto. Bo-morwa-rragwe Josefe ba boela

kwa gae le dineo tse di humileng tsa ga Iseraele. Gape ba ne ba filwe dineo tsa bone le bone.

Iseraele o bone dikoloi di tla. O bone lesomo lotlhe la ditonki le belege dineo. O bone bo-morwawe botlhe ba boa, le eleng Benjamin. Mme banna ba mmolelela gore ba bone Josefe. Iseraele o ne a seka a ba dumela. Mme fa a bone dikoloi le dineo, o ne a simolola go ipela gonne jaanong o ne a boetswe ke bo-morwawe ba ba lesome le bobedi gape.

Mme o rile, *"Go lekane, Josefe morwaake o sa tshedile, ke tla ya ke mmona ke ise ke swe"* (Genesis 45:28).

Jalo batho ba ga Iseraele ba fudugela kwa Egepeto. Pele ga a dule mo Kanana, Iseraele o iseditse Modimo ditshupelo. Mme Modimo O buile le ene mo torong. Modimo O boleletse Iseraele gore a seka a tshaba go ya kwa Egepeto. Modimo O solofeditse go ya le ene, le go mo dira morafe o motona teng. Modimo O solofeditse go busetsa losika lwa gagwe gape kwa Kanana. Jalo Iseraele a fuduga mo Kanana a ya Egepeto.

Josefe o ne a tswa go kopana le rragwe. Ba ntse le bokopano-gape jo bo tletseng dikeledi tsa boitumelo. Josefe o tlhaloseditse rragwe mekgwa ya Baegepeto. Baegepeto ba ne ba sa rate badisa, jalo matlhape le matsomane a ne a ya kwa karolong ya Egepeto e bidiwa Goshena. Mme Farwe a dira bo-mogoloe Josefe le eleng badisa ba matlhape a gagwe. Mme Josefe a thusa go otlala ba lelwapa la ga rragwe.

(Balela tlelase Genesis 49:33 - 50:3.)

JAKOBE O A SWA

Jakobe o tshedile dingwaga di le lesome le bosupa morago ga a fudugetse kwa Goshena. O ne a na le dingwaga di le lekgolo masome a le mane le bosupa. Iseraele o segofaditse bana ba ga Josefe mme a ba balela jaaka ba gagwe. Ke ka ntlha e, re bala maina a bone mo ditšhabeng tse di lesome le bobedi tsa Iseraele boemong jwa ga Josefe. Mme Iseraele o boleletse bo-morwawe dilo tse di tla diragalelang malwapa mangwe le mangwe a bone mo nakong e e tlang. Mme Iseraele a bolelela bo-morwe kwa ba tshwanetseng go mo fitlha gone. Mme a swa.

Setlhophapha se setona sa batho ba ile Kanana go fitlha Iseraele mo logageng lwa ga Aberahame kwa Makapela. Baegepeto le Baiseraele ba tsamaile mmogo. Khutsafalo e kgolo e ne ya tshwarelwa Iseraele. Josefe o ne a hutsafalela rragwe.

(Balela tlelase Genesis 50:15-21.)

BO-MORWA-RRAGWE (JOSEFE) BA A BOIFA

Bo-mogoloe Josefe ba gopotse gore Iseraele e ntse e le tshireletso ya bone. Jaanong rraabone, Iseraele o ne a sule. Ba gakgametse gore Josefe o tla dira eng? A o ne a ka ba otlhaya a ipusolosetsa?

Banna ba romela molaetsa kwa go Josefe o tswa mo go rraabone, Iseraele. Pele ga loso lwa gagwe, Iseraele o boleletse banna go kopa Josefe go itshwarela barwa-rragwe. Bo-mogoloe le bone ka bo-bone ba kopile Josefe go ba itshwarela. Fa Josefe a utlwile mafoko a bone o simolotse go lela. Josefe o ne a setse a ba itshwaretse. Ka ntlha ya molato o ba ntse ba o tshotse mo dipelong tsa bone ka nako e e kalo, ba ne ba se kake ba dumela Josefe.

Josefe o boleletse bo-mogoloe go se boife. O rile e ne e se Modimo (ene). E ne e se moatlhodi wa bone. O ne a se kake a ba utlwisabotlhoko. Josefe o gakolotse banna gore Modimo O dirisitse bokgoba jwa gagwe go tlisa molemo. Ba-lelwapa ba ne ba bolokilwe mo leubeng. Josefe o solofeditse go tswelela a tlhokomela banna le malwapa a bone. Batho ba Kgolagano ya Modimo ba ne ba tla babalelwa.

Josefe o ne a segogaditswe ke Modimo. O ne a ka bona gore bosula bo fetoletswe mo molemong. O itsile gore o tshwanetse go itshwarela bo-morwa-rragwe. O itsile gore ke Modimo fela O O ntseng le tshiamelo ya go ba otlhaya. O ne a se kake a nna le kagiso mo pelong ya gagwe fa pele ga Modimo fa a ne a itseela tiro ya Modimo (ya go otlhaya). Josefe o ne a ka bona gore ditiragalo tsa botshelo jwa gagwe e ne e le karolo ya thulaganyo ya Modimo. Thulaganyo ya Modimo e ne e tlhokega thata go feta ditiragalo tse di mo botshelong jwa motho. Josefe o ne a le mo kagisong ka ntlha ya gore o itsile fa a le kafa-tlase ga Modimo. O dumetse pabalelo ya Modimo mo go ene. O dumetse boeteledi-pele jwa Modimo mo botshelong jwa gagwe. Jalo o ne a sa tlhoke go ithulaganyetsa ditiragalo. O ne a sa tlhoke go otlhaya ope. O ne a ka itshwarela. O ne a setse a itshwaretse bo-mogoloe pele ga ba tla go kopa.

DILO TSA GO DI GOPOLA

Dinako dingwe botshelo bo lebega bo le thata thata. Dinako dingwe batho ba dira dilo tse di re utlwisang-botlhoko. Mme le rona re dira dilo tse di utlwisang Morena wa rona botlhoko. O re itshwarela jaaka re itshwarela ba bangwe. Re tshwanetse go dira matshelo a rona go tswana le sekai se Jesu o re se fileng. Jesu o ne a itshwarela le eleng batho ba ba mo kokotetseng mo sefapaanong.

Jalo re tshwanetse go itshwarela ba bangwe. Re tshwanetse go letla Modimo ka Bo-One go nna moatlhodi. Ke Modimo fela O O nang le tshiamelo ya go otlhaela batho dibe. Tlhopha go dira botshelo jwa gago jaaka botshelo jwa ga Jesu. Baya tumelo ya gago mo Moreneng. Mo kope go Ikgalaletsa ka go fetolela bosula jo bo diriwang kgatlhanong le wena mo sengweng se se molemo.

SE THUTO E E SE RE RUTANG

1. Ga re na bokopano jo bo siameng le mongwe le mongwe ka metlha. Ga re dumelane le bakaulengwe ba Bakeresete ka metlha.
2. Re tshwanetse go eletsa go amogela bakaulengwe ba rona ba Bakeresete mme re ba itshwarele fa ba re fosetsa gongwe ba re utlwisa-botlhoko.
3. Ga re kake ra amogela Modimo go re itshwarela, fa re sa itshwarele ba bangwe.